

摘藻堂四庫全書薈要

集部

欽定四庫全書薈要卷二萬八百十五

集部

詞綜卷十七

翰林院檢討朱彝尊編

宋詞六十首

盧祖皋

十四首

高觀國

二十首

史達祖

二十六首

盧祖皋

字申之永嘉人一云邛州人慶元中登第嘉定中為軍器少監有蒲江集詞一卷

黃叔暘云蒲江樂章

甚工字字可入律呂

倦尋芳

香泥壘燕密葉巢鶯春晴寒淺花徑風柔著地舞裊紅
軟鬪草烟欺羅袂薄秋千影落春遊倦醉歸來記寶帳
歌慵錦屏香暖別來悵光陰容易還又荼蘼牡丹開
遍妒恨疎狂那更柳花迎面鴻羽難憑芳信短長安猶
近歸期遠倚危樓但鎮日繡簾高捲

西江月

燕掠晴絲裊裊魚吹水葉粼粼禁街微雨灑芳塵寒食
清明相近謾著宮羅試煖閒呼社酒酬春晚風簾幕

悄無人二十四番花信

清平樂

柳邊深院燕語明如剪消息無憑聽又懶隔斷畫屏雙
扇寶盃金縷紅牙醉魂幾度兒家何處一春游蕩夢
中猶恨楊花

烏夜啼

段段寒沙淺水蕭蕭暮雨孤篷香羅不共征衫遠砧杵
客愁中別恨慵看楊柳歸期暗數芙蓉碧梧聲到紗

窓曉昨夜已秋風

又西湖

漾煖紋波颭颭吹晴絲雨濛濛輕衫短帽西湖路花氣
撲春驄鬪草褰衣濕翠秋千瞥眼飛紅日長不放春
醪困立盡海棠風

謁金門

蘭棹舉相趁落紅飛去一隙輕簾凝睇處柳絲牽不住
昨日翠蛾金縷今夜碧波烟渚好夢無憑窓又雨天

涯知幾許

又

閒院宇獨自行來行去花片無聲簾外雨峭寒生碧樹
做弄清明時序料理春醒情緒憶得歸時停棹處畫
橋看落絮

水龍吟

淮西
重午

會昌湖上扁舟幾年不醉西山路流光又是宮衣初試
安榴半吐千里江山滿川烟草薰風淮楚念離騷恨遠

獨醒人去闌干外誰懷古
亦有魚龍戲舞艷晴川綺
羅歌鼓鄉情節意樽前同是天涯羈旅漲綠池塘翠陰
庭院歸期無據問明年此夜一眉新月照人何處

又荼蘼

蕩紅流水無聲暮烟細草粘天遠低徊倦蝶往來忙燕
芳期頓懶綠霧迷牆翠虬騰架雪明香暖笑依依欲挽
春風教住還疑是相逢晚不似梅妝瘦減占人間半
神蕭散攀條弄藥天涯猶記曲欄小院老去情懷酒邊

風味有時重見對枕幃空想東窓舊夢帶將離恨

洞仙歌

茉莉

玉肌翠袖較似荼蘼瘦幾度熏醒夜窓酒問炎州何事
得許清涼塵不到一段冰壺剪就晚來庭戶悄暗數
流光細拾芳英黯回首念日暮江東偏為魂銷人易老
幽韻清標似舊正紋簾如波帳如烟更奈向月明露濃
時候

鷓鴣天

庭綠初圓結蔭濃香溝收拾樹梢紅池塘少歇鳴蛙雨
簾幕輕迴舞燕風春又老笑誰同澹烟斜日小樓東
相思一曲臨風笛吹過雲山第幾重

魚游春水

離愁禁不去好夢別來無覓處風翻征袂觸目年芳如
許軟紅塵裏鳴鞭鐙拾翠叢中勾伴侶都負歲時暗闕
情緒昨夜山陰杜宇似把歸期驚倦旅遙知樓倚東
風凝顰暗數寶香拂拂遺鴛錦心事悠悠尋燕語芳草

暮寒亂花微雨

賀新郎

彭傳師於三高祠前作釣雪亭趙子野邀余賦之

挽住風前柳。問鴟夷、當日扁舟，近曾來否。月落潮生無
限事，零落茶烟未久。謾留得、蓴鱸依舊，可是功名從來
誤。撫荒祠、誰繼風流，後今古。恨一搔首。江涵鴈影，梅
花瘦。四無塵雪。飛雲凍夜窓如畫。萬里乾坤清絕處，付
與漁翁釣叟。又恰是、題詩時候。猛拍闌干呼鷗鷺，道他
年我亦垂綸手。飛過我共樽酒。

沁園春

雙溪
狎鷗

幾葉凋楓半篙寒日傍橋繫船愛洞門深鎖人間福地
雙溪分占天上星躔破帽歌寒短鞭敲月此地經行知
幾年空贏得似沈郎消瘦還欠詩篇沙鷗伴我愁眠
向水驛風亭紅蓼邊有村醪可飲且須同醉溪魚堪鱠
切莫論錢笠澤陂頭垂虹亭上橙蟹肥時霜滿天相隨
否算江南江北惟有君閒

高觀國

字賓王山陰人有
竹屋癡語一卷

陳唐卿云竹屋梅谿詞要是不經人道語其妙處少游美成亦未及也張叔夏云竹屋白石邦卿夢窓格調不凡句法挺異俱能特立清新之意刪削靡曼之詞自成一家

蘭陵王

春雨

灑塵閣幕幕天垂似幕春寒峭吹斷萬絲濕影和烟暗
簾箔清愁曉來覺佳景惜惜過却芳郊外鶯恨燕愁不
管秋千冷紅索行雲楚臺約念今古凝情朝暮如昨
啼紅濕翠春情薄謾一犁江上半篙堤外勾引輕陰趁
畫角正孤緒寂寞斑駁止還作聽點點簷聲沉沉春

酌只愁入夜東風惡怕催教花放趲將花落溟濛烟草
夢正遠恨怎託

御街行

詠轎

藤筠巧織花紋細稱穩步如流水踏青陌上雨初晴嫌
怕濕文鴛雙履要人送上逢花須住纔過處香風起
裙兒挂在簾兒裏更不把窓兒閉紅紅白白簇花枝恰
稱得尋春芳意歸來時晚紗籠引道扶下人微醉

又賦簾

香波半窄深深院正日上花陰淺青絲不動玉鈎閒看
翠額輕籠葱蒨鶯聲似隔篆烟微度愛橫影參差滿
那回低挂朱欄畔念悶損無人捲窺春偷倚不勝情仿
彿見如花嬌面纖柔緩揭簷然飛去不似春風燕

玲瓏四犯

水外輕陰做弄得飛雲吹斷晴絮駐馬橋西還繫舊時
芳樹不見翠陌尋春問著小桃無語恨燕鶯不識閒情
却隔亂紅飛去少年曾失春風意到如今怨恨難訴

魂驚冉冉江南遠
烟草愁如許
此意待寫翠箋
奈斷腸
都無新句問甚時
舞鳳歌鸞花底
再看仙侶

菩薩蠻

春風吹綠湖邊草
春光依舊湖邊道
玉勒錦障泥
少年游冶時
烟明花似繡
且醉旗亭酒
斜日照花西
歸鴉花外啼

解連環

柳

露條烟葉惹長亭
舊恨幾番風月愛
細縷先牽輕黃漸

拂水藏鴉翠陰相接纖軟風流眉黛淺三眠初歇奈年
華又晚縈絆游蜂絮飛晴雪 依依灞橋怨別正千絲
萬緒難禁愁絕悵歲久應長新條念曾繫花驄屢停蘭
楫弄影搖晴恨閒損春風時節隔郵亭故人望斷舞腰
瘦怯

燭影搖紅

別浦潮平遠村帆落烟江冷征鴻相喚著行飛不耐霜
風緊雪意垂垂未定正慘慘雲橫疎影酒醒情緒日晚

登臨淒涼誰問
行樂京華軟紅不斷香塵噴試將心
事卜歸期終是無憑準寥落年華將盡誤玉人高樓凝
恨第一休負西子湖邊江梅春信

喜遷鶯

涼雲歸去再約著晚來西樓風雨水靜簾陰鷗閒菰影
秋到露汀烟浦試省喚回幽恨盡是愁邊新句倦登眺
動悲涼還在殘蟬吟處淒楚空見訴香鎖霧扇心似
秋蓮苦寶瑟彈冰玉臺窺月淺黛可憐偷聚幾時翠溝

題葉無復繡簾吹絮鬢華晚念庾郎情在風流誰與

霜天曉角

春雲粉色春水和烟濕試問西湖楊柳東風外幾絲碧
望極連翠陌蘭橈雙槳急欲訪莫愁何處旗亭在畫

橋側

卜算子

屈指數春來彈指驚春去檐外蛛絲網落花也要留春
住
幾日喜春晴幾夜愁春雨十二雕窓六曲屏題徧

傷春句

少年遊草

春風吹碧春雲映綠夢曉入芳茵軟襯飛花遠連流水
一望隔香塵萋萋多少江南舊恨翻憶翠羅裙冷落
閒門淒迷古道烟雨正愁人

齊天樂

碧雲闕處無多雨愁與去帆俱遠倒葦沙閒枯蘭砌冷
寥落寒江秋晚樓陰縱覽正魂怯清吟病多消黯怕揖

西風袖羅香自去年減
風流江左久客舊游得意處
朱簾曾卷載酒春情吹簫夜約猶憶玉嬌香軟塵樓故
苑歎壁月空簷夢雲飛觀送絕征鴻楚峰烟數點

又

中秋夜
懷梅谿

晚雲知有關山念澄霄卷開清霽素景中分冰盤正溢
何啻嬋娟千里危欄靜倚正玉管吹涼翠觴留醉記約
清吟錦袍初喚醉魂起孤光天地共影浩歌誰與舞
淒涼風味古驛烟寒幽垣夢冷應念秦樓十二歸心對

此想斗插天南鴈橫遼水試問姮娥有愁能為寄

玉樓春

春烟淡淡生春水曾記芳洲蘭棹艤岸花香到舞衣邊
汀草色分歌扇底棹沉雲去情千里愁壓雙鴛飛不
起十年春事十年心怕說濺裙當日意

永遇樂

次韻弔青樓

淺暈脩蛾脆痕紅粉猶記窺戶香斷奩空塵生砌冷誰
喚青鸞舞春風花信秋宵月約歷歷此心曾許銜芳恨

千年怨結玉骨未應成土
木蘭艇子莫愁何在謾繫
寒江烟樹事逐雲沉情隨珮冷短夢分今古一抔遙夜
孤光難曉多少碎人腸處空淒黯西風細雨盡吹淚去
金人捧露盤

楚宮閑金成屋玉為欄斷雲夢容易驚殘驪歌幾疊至
今愁思怯陽關清音恨阻抱哀箏知為誰彈年華晚
月華冷霜華重鬢華斑也須念閑損雕鞍斜緘小字錦
江三十六鱗寒此情天濶正梅信笛裏關山

鳳栖梧

雲喚陰來鳩喚雨謝了江梅可踏江頭路
揉却一番花信阻不成日日春寒去
見說東風桃葉渡岸隔青山
依舊橫眉嫵歸鴈不如筇上柱
一行常見相思苦

賀新郎

梅

月冷霜袍擁見一枝年華又晚粉愁香凍
雲隔溪橋人不度的
顰春心未縱清影怕寒波搖動更沒纖毫塵俗
態倚高情預得春風寵
沉凍蜨挂么鳳
一杯正要吳

姬捧想見那柔酥弄白暗香偷送回首羅浮今在否寂
寞烟迷翠壠又爭奈桓伊三弄開遍西湖春意爛算羣
花正作江山夢吟思怯暮雲重

祝英臺近

荷花

擁紅妝翻翠蓋花影暗南浦波面澄霞蘭艇採香去有
人水濺湘裙相招晚醉正月上涼生風露兩凝佇別
後歌斷雲間嬌姿黯無語魂夢西風端的此心苦遙想
芳臉輕顰凌波微步鎮輸與沙邊鷗鷺

清平樂

春蕪雨濕燕子低飛急雲壓前山羣翠失烟水滿湖輕
碧小蓮相見灣頭清寒不到青樓請上琵琶絃索今
朝破得春愁

史達祖

字邦卿汴人有
梅溪詞二卷

姜堯章云邦卿詞奇秀清逸融情景于一家
會句意于兩得張功甫云生詞纖綃泉底
去塵眼中妥貼輕圓辭情俱到有環奇警邁
清新閑婉之長而無詭蕩汙淫之失端可分
鑣清真平
睨方回

綺羅香

春雨

做冷欺花將烟困柳千里偷催春暮盡日冥迷愁裏欲
飛還住驚粉重蜨宿西園喜泥潤燕歸南浦最妨他佳
約風流鈿車不到杜陵路沉沉江上望極還被春潮
晚急難尋官渡隱約遙峰和淚謝娘眉嫵臨斷岸新綠
生時是落紅帶愁流處記當日門掩梨花剪燈深夜語

雙雙燕

春燕

過春社了度簾幕中間去年塵冷差池欲住試入舊巢

相並還相雕梁藻井又軟語商量不定飄然快拂花梢
翠尾分開紅影芳徑芹泥雨潤愛貼地爭飛競誇輕
俊紅樓歸晚看足柳昏花暝應自棲香正穩便忘了天
涯芳信愁損翠黛雙蛾日日畫欄獨凭

玉樓春

梨花

玉容寂寞誰為主寒食心情愁幾許前身清淡似梅妝
遙夜依微留月住香迷蝴蝶飛時路雪在秋千來住
處黃昏著了素衣裳深閉重門聽夜雨

萬年歡

兩袖梅風謝橋邊岸痕猶帶陰雪過了匆匆燈市草根
青發燕子春愁未醒悞幾處芳音遼絕烟溪上采菜人
歸定應愁沁花骨非干厚情易歇奈燕臺句老難道
離別小徑吹衣曾記故里風物多少驚心舊事第一是
侵堦羅襪如今但柳髮晞春夜來和露梳月

壽樓春

尋春服
感念

裁春衫尋芳記金刀素手同在晴窓幾度因風殘絮照

花斜陽誰念我今無腸自少年消磨疎狂但聽雨挑燈
歎牀病酒多夢睡時妝飛花去良宵長有絲闌舊曲
金譜新腔最恨湘雲人散楚蘭魂傷身是客愁為鄉算
玉簫猶逢韋郎近寒食人家相思未忘蘋藻香

祝英臺近

落花深芳草暗春到斷腸處金勒驕風欲過大堤去翠
樓葛嶺西邊恰如舊約畫欄映一枝瓊樹正凝佇芳
意欺月矜春渾欲便偷去多少鶯聲不敢寄愁與謝郎

日日西湖如今歸後幾時見倚簾吹絮

西江月

西月澹窺樓角東風暗落簷牙一燈初見影窸紗又是
重簾不下幽思屢隨芳草閒愁又似楊花楊花芳草
遍天涯繡被春寒夜夜

夜行船

正月十八日聞
賣杏花有感

不剪春衫愁意態過收燈有些寒在小雨空簾無人深
巷已早杏花先賣白髮潘郎寬沈帶怕看山憶他眉

黛草色拖裙烟光染鬢長記故園挑菜

蝶戀花

二月東風吹客袂蘇小門前楊柳如腰細胡蝶識人遊
冶地舊曾來處花開未幾夜湖山生夢寐萍泊尋芳
只怕春寒裏今歲清明逢上巳相思先到濺裙水

臨江仙

草腳青回細膩柳梢綠轉苗條舊遊重到合魂消棹橫
春水渡人凭赤欄橋歸夢有時曾見新愁未肯相饒

酒香紅被夜迢迢莫教無用月來照可憐宵

又

倦客如今老矣舊遊可奈春何幾曾湖上不經過看花
南陌醉駐馬翠樓歌遠眼愁隨芳草湘裙憶著春羅
枉教裝得舊時多向來簫鼓地曾見柳婆娑

八歸

秋江帶雨寒沙縈水人瞰畫樓愁獨烟蓑散響驚詩思
還被亂鷗飛去秀句難續冷眼盡歸圖畫上認隔岸微

茫雲屋想半屬漁市樵村欲暮競燃竹
須信風流未
老憑持酒慰此淒涼心目一鞭南陌數篙官渡賴有歌
眉舒綠只匆匆遠眺早覺閒愁挂喬木應難禁故人天
際望徹淮山相思無鴈足

過龍門

醉月小紅樓錦瑟瑩篴夜來風雨曉來收幾點落花饒
柳絮同為春愁 寄信問晴鷗誰在芳洲綠波寧處有
蘭舟獨對舊時攜手地情思悠悠

秋霽

江水蒼蒼望倦柳愁荷共感秋色廢閣先涼古簾空暮
鴈程最嫌風力故園信息愛渠入眼南山碧念上國誰
是鱸江漢未歸客還又歲晚瘦骨臨風夜聞秋聲
吹動空寂露蛩鳴清燈冷屋翻書愁上鬢毛白年少俊
遊渾斷得但可憐處無奈苒苒驚魂採香南浦剪梅烟
驛

惜黃花

定興
道中

涵秋寒渚染霜丹樹尚依稀是來時夢中行路時節正
思家遠道仍懷古更對著滿城風雨黃花無數碧雲
欲暮美人兮美人兮未知何處獨自捲簾櫳誰為開尊
俎恨不得御風歸去

齊天樂

賦橙

犀紋隱隱鶯黃嫩籬落翠深偷見細雨重移新霜試摘
佳處一年秋晚荆江未遠想橘友荒涼木奴嗟怨就說
風流草泥來趁蟹螯健并刀寒映素手醉魂沉夜飲

曾倩排遣沆瀣含酸金罍裏玉簌簌吳鹽輕點瑤姬齒
軟待惜取團圓莫教分散入手溫存帕羅香自滿

又白髮

秋風早入潘郎鬢斑斑遽驚如許暖雪侵梳晴絲拂領
栽滿愁城深處瑤簪謾妒便羞插宮花自憐衰暮尚想
春情舊吟淒斷茂陵女人間公道惟此歎朱顏也恁
容易飄去湮了重緇搔來更短方悔風流相誤郎潛幾
縷漸疎了銅駝俊遊儔侶縱有黦黦奈何詩思苦

又

湖上即席分
賦得羽字

鴛鴦拂破蘋花影
低低趁涼飛去
畫裏移舟詩邊就夢
葉葉碧雲分雨芳游
自許過柳影閒波水
花平渚見說
西風為人吹恨上瑤樹
闌干斜照未滿杏牆
應望斷
春翠偷聚淺約揆香
深盟搗月誰是窓間
青羽孤筇幾
柱問因甚參差暫成
離阻夜色空庭待歸
聽俊語

夜合花

柳鎖鶯魂花翻蜨夢
自知愁染潘郎輕衫
未攬猶將淚

點偷藏念前事怯流光早春窺酥雨池塘向銷凝裏梅
開半面情滿徐妝風絲一寸柔腸曾在歌邊惹恨燭
底縈香芳機瑞錦如何未織鴛鴦人扶醉月依牆是當
初誰敢踈狂把閒言語花房夜久各自思量

東風第一枝

春雪

巧沁蘭心偷粘草甲東風欲障新暖謾疑碧瓦難留信
知暮寒較淺行天入鏡做弄出輕鬆纖軟料故園不捲
重簾悞了乍來雙燕青未了柳回白眼紅欲斷杏開

素面舊游憶著山陰後盟遂妨上苑熏爐重熨便放慢
春衫鍼線怕鳳靴挑菜歸來萬一灞橋相見

又立春

草脚愁回

一作蘇

花心夢醒鞭香拂散牛土舊歌空憶珠

簾彩筆倦題繡戶粘雞貼燕想占斷東風來處暗惹起

一掬相思亂藏翠盤紅縷

今夜覓夢池秀句明日動

探花芳緒寄聲沽酒人家款

一作預

約嬉

一作俊

遊伴侶憐

他梅柳怎忍後天街酥雨待過了一月燈期日日醉扶

歸去

張叔夏云不獨措辭精粹又且見時節風物之感

風流子

紅樓橫落日蕭郎去幾度碧雲飛記窓眼遞香玉臺妝
罷馬蹄敲月沙路人歸如今但一鶯通信息雙燕說相
思入耳舊歌怕聽金縷斷腸新句羞染烏絲相逢南
溪上桃花嫩嬌樣淺淡羅衣恰是怨深腮赤愁重聲遲
悵東風巷陌草迷春恨軟塵庭戶花悞幽期多少寄來
芳字都待還伊

三姝媚

烟光搖縹瓦望晴簷風裊柳花如灑錦瑟橫牀想淚痕
塵影鳳絃長下倦出犀帷頻夢見王孫驕馬諱道相思
偷理綃裙自驚腰袂惆悵南樓遙夜記翠箔張燈枕
肩歌罷又入銅駝遍舊家門巷首詢聲價可惜東風將
恨與閒花俱謝記取崔徽模樣歸來暗寫

喜遷鶯

元宵

月波凝滴望玉壺天近了無塵隔翠眼圈花冰絲織練

黃道寶光相直自憐詩酒瘦難應接許多春色最無賴
是隨香趁燭曾伴狂客 踪跡謾記憶老了杜郎忍聽
東風笛柳院燈疎梅廳雪在誰與細傾春碧舊情拘未
定猶自學當年游歷怕萬一誤玉人夜寒窓際簾隙

湘江靜

暮草堆青雲浸浦記匆匆倦篙曾駐漁榔四起沙鷗未
落怕愁沾詩句碧袖一聲歌石城怨西風隨去滄波蕩
晚菰蒲弄秋還重到斷魂處 酒易醒思正苦想空山


桂香懸樹三年夢冷孤吟意短屢烟鐘津鼓屐齒厭登
臨移橙後幾番涼雨潘郎漸老風流頓減閒居未賦

陽春

杏花烟梨花月誰與暈開春色坊巷曉悵悵東風斷舊
火銷處近寒食少年踪跡愁暗隔水南山北還是寶絡
雕鞍被鶯聲喚來香陌記飛蓋西園寒猶凝驚醉耳
誰家夜笛燈前重簾不挂殢華裾粉淚曾拭如今故里
信息賴海燕年時相識奈芳草正鎖江南夢春衫怨碧



詞綜卷十七



總校官庶吉士臣張能照

校對官中書臣潘庭筠

謄錄監生臣王永年

欽定四庫全書薈要

集部

詞綜卷十八

九

詳校官編修臣繆晉



欽定四庫全書薈要卷二萬八百十六集

詞綜卷十八

翰林院檢討朱彝尊編

宋詞六十一首

汪莘

七首

吳潛

五首

李昂英

一首

史雋之

一首

章謙亨

一首

趙以夫

八首

陳經國

二首

方岳

五首

張榘

一首

洪璚

五首



方千里 四首

汪暉 一首

尹煥 二首

馮取洽 二首

陳以莊 一首

盧炳 四首

沈端節 一首

潘枋 一首

馮艾子 一首

黃昇 四首

文及翁 一首

李芸子 一首

嚴羽 一首

李廷忠 一首

王以寧 一首

汪莘

字叔耕休寧人嘉定間下詔求言叩閣三上書不報為楊慈湖朱晦庵真西山諸公所歎

服後築室柳溪自號方壺居士有方壺存稿詞二卷

孫山甫云柳塘長短句似坡翁不受音律束縛程迺水曰叔耕蘊霞箋玉滴之奇而憂深思遠未易遽班之賀白也

杏花天

美人家在江南住每惆悵江南日暮白蘋洲畔花無數
還憶瀟湘風度幸自是斷腸無處怎強作鶯聲燕語
東風占斷秦箏柱也逐落花歸去

好事近

夾岸隘桃花花下蒼苔如積
驀地輕寒一陣上桃花顏色
東鄰西舍絕經過新月是相識
白玉闌干斜倚作蓬山春夕

謁金門

簷漏滴都是春歸消息帶雨牡丹無氣力黃鸝愁雨濕
爭看洛陽春色忘却連天草碧南浦綠波雙槳急沙頭人佇立

玉樓春

贈別孟
倉使

一片江南春色晚牡丹花謝鶯聲懶
問君離恨幾多長
芳草連天猶覺短
昨夜溪頭新溜滿
樽前自起噴龍
管明朝飛棹下錢塘
心共白蘋香不斷

憶秦娥

村南北夜來陡覺霜風急
霜風急征途情緒塞垣消息
佳人獨抱琵琶泣
一江明月空相憶
空相憶寒衣未
絮荻花狼籍

乳燕飛

感秋采楚
詞賦此

去郢頻回首正橫江蓀橈容與蘭旌悠久悵望龍門都
不見似把長楸辜負念往日佳人為偶獨向芳洲相思
處采蘋花杜若空盈手乘赤豹誰來後雲中眼界窮
高厚覽山川冀州還在陶唐何有木葉紛紛秋風晚縹
緲瀟湘左右見帝子冰魂相守應記揮絃相對日酹一
杯太乙東皇酒問此意君知否

八聲甘州

惜餘春蛺蝶引春來杜鵑趣春歸算何如桃李渾無言
說開落忘機多謝黃鸝舊友相逐落花飛芳草連天遠
愁殺斜暉誰向西湖畔問亭臺在否花木應非看
孤山山下惟說隱君廬想錢塘春遊依舊到梨花寒食
隘舟車尋常事不須惆悵暮雨沾衣

吳

潛

字毅夫寧國人嘉定十年進士第一淳祐中
叅知政事拜右丞相兼樞密使進左丞相封

慶國公改封許國公景定初安置
循州卒贈少師有履齋詩餘三卷

滿江紅

滕王閣

萬里西風吹我上滕王高閣正檻外楚山雲漲楚江濤
作何處征帆林杪去有時野鳥沙邊落近簾鉤暮雨掩
空來今猶昨 秋漸緊添離索天正遠傷漂泊數十年
心事休休莫莫歲月無多人易老乾坤雖大愁難著向
黃昏斷送客魂銷城頭角

酹江月

瓜洲會趙南仲端明

芳春遊騎趁風光淡蕩踏青南陌雪浪堆邊呼曉度吳
楚半江分坼歲月驚心風埃眯目相對頭俱白楊花撩

亂可憐如此春色 誰道燕燕鶯鶯多情猶自認得年
時客重唱江南腸斷句為我滿傾雲液畫鼓舟移金鞍
人遠一晌烟波隔斜陽冉冉依然無限悽惻

二郎神

小樓向晚正柳鎖一城烟雨計十里吳山繡簾朱戶曾
學宮詞內舞浪逐東風無人管但脉脉歲移年度嗟往
事未塵新愁還織恁堪重訴 凝竚問春何事飛紅飄
絮縱杜曲秦川舊家都在誰寄音書說與野草淒迷暮

雲沉黯渾自替人無緒珠淚滴應把寸腸萬結夜帷深處

鵲橋仙

扁舟乍泊危亭孤嘯目斷閒雲千里前山急雨過溪來
盡洗却人間暑氣暮鴉木末落鳬天際都是一番
秋意癡兒騃女賀新涼也不道西風又起

一作

青玉案

十年三過蘇臺路還又是匆匆去迅景流光容易度驚

洲鷗渚葦汀蘆岸總是消魂處
蒼烟欲合斜陽暮付
與愁人砌愁句為問新愁愁底許
酒邊成醉醉邊成夢
夢斷前山雨

李昉英

一作昉英字俊明一云字公昉番禺人一云資州人寶慶中進士第三人任臨汀推官累官吏部侍郎卒謚忠簡有文溪詞一卷

蘭陵王

燕穿幕春在深深院落單衣試龍沫旋熏又怕東風曉
寒薄別來情緒惡瘦得腰圍柳弱清明近正似海棠怯

雨芳踪任飄泊
釵留去年約
恨易老
嬌鶯多誤
靈鵲
碧雲香縹天涯各
望不斷
芳草又迷香絮迴
文強寫字
屢錯淚欲注
還閣
孤酌駐春脚
更彩局誰快
寶軫慵
學階除拾取
飛花嚼
是多少
春恨等閒吞
却闌干猛拍
歎命薄悔舊諾

史舊之

紹定初知
江陰軍

望海潮

浮遠
堂

危岑孤秀飛軒爽
豁空江泱泱
黃流吳札故丘春
申舊

國西風吹換清秋滄海浪初收共登高臨眺尊俎綢繆
鳳集高岡駒留空谷接英游八窓盡控瓊鈎送帆檣
杳杳潮汐悠悠今古興懷闕河極目愁邊滅沒輕鷗淮
岸隔重洲認澹霞天末一縷青浮未許英雄老去西北
是神州

章謙亨

字牧叔吳興
人為鉛山令

念奴嬌

垂楊

垂楊得地在樓臺側畔無人攀折不似津亭舟繫處只

伴客愁離別絲過搖金帶鋪新翠雅稱鶯調舌芳筵相
映最宜斜挂殘月却得連日春寒未教輕滾一片庭
前雪應恨張郎今老去難比風流時節醉眼渾醒愁眉
都展舞困腰肢怯有時微笑把伊綰箇雙結

趙以夫

字用父長樂人端平中知
漳州有虛齋樂府二卷

孤鸞

梅

江頭春早問江上寒梅占春多少自照疎星冷牀許春
風到幽香不知甚處但迢迢滿河烟草回首誰家竹外

有一枝斜好 記當年曾共花前笑
念玉雪襟期有誰知道
喚起羅浮夢正參橫月小
淒涼更吹寒管謾相思
鬢毛驚老待覓西湖半曲對霜天清曉

龍山會

九日

九日無風雨一笑凭高浩氣橫
秋宇羣峰青可數寒城
小一水縈迴如縷西北最關情
謾遙指東徐南楚黯消
魂斜陽冉冉鴈聲悲苦
今朝寒菊依然重上南樓草
草成歡聚詩朋休浪賦
舊題處俛仰已隨塵土
莫放酒

行疎清漏短涼蟾當午也全勝白衣未至獨醒凝竚

角招

梅

曉寒薄苔枝上剪成萬點冰萼暗香無處著立馬斷魂
晴雪籬落溪略約恨寄驛音書遼邈夢遶揚州東閣風
流舊日何郎想依然林壑離索引杯自酌相看冷淡
一笑人如削水雲寒漠漠底處羣仙飛來霜鶴芳姿綽
約正月滿瑤臺珠箔徙倚闌干寂寞盡分付許多愁城
頭角

徵招雪

玉壺凍裂琅玕折，駸駸逼人衣袂暖。絮漲空飛失前山，
橫翠欲低還又起。似妝點滿園春意，記憶當時刻中情。
味一溪雲水。天際絕人行，高吟處依稀灞橋鄰里。更
剪剪梅花落雲階，月砌化工真解事。強勾引老來詩思。
楚天暮驛，使不來，悵曲欄獨倚。

二郎神

次陳
唯道

野塘暗碧漸點點，翠鈿明鏡想畫永。珠簾人閒金屋時，

倚妝臺照影睡起闌干凝思處漫數盡歸鴉栖暝知月
下鶯黃雲邊蛾綠為誰重整 曾倩鴈傳鵲報心期罕
定奈柳絮浮雲桃花流水長是參差不並莫怨春歸莫
愁柘老蠶已三眠將醒腸斷句枉費丹青漠漠水遙烟
迴

雙瑞蓮

千機雲錦裏看並蒂新房駢頭芳藥清標艷態兩兩翠
裳霞袂似是商量心事倚綠蓋無言相對天蘸水彩舟

過處鴛鴦驚起

縹緲影搖香想劉阮風流雙仙姝

麗閒情未斷猶戀人間歡會莫待西風吹老薦玉醴碧
筒揅醉清露底月照一襟歸思

永遇樂

七夕和
劉隨如

雲鴈將秋露螢照夜涼透窓戶星網珠疎月奩金小清
絕無點暑天孫河鼓東西相望隱隱光流華渚妝樓上
青瓜玉果多少駢兒癡女金鍼暗度蛛絲密結便有
繫人心處經歲離思霎時歡愛愁緒空萬縷人間天上

一般情味枉了錦箋囑付又何似吹笙仙子跨黃鶴去

鵲橋仙

翠鋪心事紅樓歡宴深夜沉沉無暑竹邊荷外再相逢
又還逐浮雲飛去錦箋尚濕珠香未歇空惹閒愁千
縷尋思不似鵲橋人猶自得一年一度

陳經國

嘉禧淳祐間人有龜峯詞一卷

齊天樂 秋聲

西風瑟瑟涼歸候孤燈自搖牕戶蛩轉花闌蟬休葉院

添洒芭蕉絲雨纔聽又住正淡月朦朧微雲來去
空廊依稀人在繡簾語多應枕畔愁絕厭二十五更
好夢頻誤響玉池邊飄梧井外一片難分竹樹零砧斷
杵更聽得空際飛來和成淒楚別有傷心處天涯驚倦
旅

沁園春

送陳起莘
歸長樂

過了梅花縱有春風不如早還正燕泥日煖草綿別路
鶯朝烟淡柳拂征鞍黎嶺天高建溪雷吼歸好不知行

路難龜山下漸楊梅初熟盧橘猶酸

名場老我間關

分歲晚誅茅湖上山歎龍舒君去尚留破硯魚軒人老
長把連環鏡影霜侵衣痕塵暗贏得狂名傳世間君歸
日見家林舊竹為報平安

方岳

字巨山祁門人理宗朝兩為文學掌故
官中秘書出守袁州有秋厓先生小稿

臺城路

和楚客
賦蘆

孤蓬夜傍低叢宿蕭蕭雨聲悲切一岸霜痕半山烟色
愁到沙頭枯葉淡雲沒滅黯西風吹老滿汀新雪天豈

無情離騷點點送歸客
歸去來兮怎得儘驚翹鷗倚
乍寒時節秋晚山川夕陽浦
澈贏得別腸千結濤翻浪
疊那得似西來一筇橫絕搔
首江南鴈銜千里月

滿江紅

九日冶
城樓

且問黃花陶令後幾番重九應解笑秋厓人老不堪詩
酒宇宙一舟吾倦矣山河兩戒君知否倚西風無奈劒
花寒虬龍吼江欲醕談天口秋何負持螯手儘石麟
蕪沒斷烟衰柳故國山圍青玉案何人印佩黃金斗倘

只消江左管夷吾終須有

水調歌頭

平山堂用
東坡韻

秋雨一何碧山色倚晴空江南江北愁思分付酒螺紅
蘆葉篷舟千里菰菜蓴羹一夢無語寄歸鴻醉眼渺河
洛遺恨夕陽中蘋洲外山欲暝斂眉峯人間俯仰陳
迹歎息兩仙翁不見當時楊柳只是從前烟雨磨滅幾
英雄天地一孤嘯匹馬又西風

又

九日多景樓
用吳侍郎韻

醉我一壺玉了此十分秋江濤還比當日擊楫渡中流
問訊重陽烟雨俯仰人間今古此意渺滄洲天地幾今
夕舉白與君浮舊黃花新白髮笑重游滿船明月猶
在何日大刀頭誰跨揚州鶴去已怨故山猿老借箸欲
前籌莫倚闌干北天際是神州

蝶戀花

用韻
秋懷

鴈落寒沙秋惻惻明月蘆花共是江南客騎鶴樓高邊
羽急柔情不盡淮山碧世路只催雙鬢白菰菜蓴羹

正自令人憶歸夢不知江水隔烟帆飛過平如席

張

槩

字方叔潤州人有芸窓詞一卷

青玉案

被檄出郊題陳氏山居

西風亂葉溪橋樹秋在黃花羞澀處滿袖塵埃推不去
馬蹄濃露雞聲淡月寂歷荒村路身名多被儒冠誤
十載重來慢如許且盡清樽公莫舞六朝舊事一江流
水萬感天涯暮

洪

璚

字叔璚自號空同詞客有詞一卷

驀山溪

憶中都

潮平風穩行色催津鼓回首望重城但滿眼紅雲紫霧
分香解佩空記小樓東銀燭暗繡簾垂昵昵凭肩語
關山千里垂柳河橋路燕子又歸來但惹得滿身花雨
彩箋不寄蘭夢更無憑燈影下月明中魂斷金釵股

踏莎行

滿滿金盃垂垂玉筍離歌不放行人去醉中扶上木蘭
船醒來忘却桃源路帶綰同心釵分一股斷魂空草

高唐賦秋山萬疊水雲深茫茫無著相思處

永遇樂

送春

歌雪徘徊夢雲溶曳欲勸春住薄倖楊花無端杜宇抵
死催教去參差烟岫千回百匝不解禁春歸路病厭厭
那堪更聽小樓一夜風雨金釵鬪草玉盤行菜往事
了無憑據合數松兒分香栢子總是牽情處小桃朱戶
題詩在否尚憶去年崔護綠陰中鶯鶯燕燕也應解語

瑞鶴仙

聽梅花吹動涼夜何其明星有爛相看淚如霰問而今
去也何時會面匆匆聚散便作秋鴻社燕最傷心夜來
枕上斷雲零雨何限因念人生萬事回首悲涼都成
夢幻芳心繾綣空惆悵巫陽館沉船頭一轉三千餘里
隱隱高城不見恨無情春水連天片帆如箭

齊天樂

轆轤聲破銀牀凍霜寒又侵鴛被皓月疎鐘悲風斷漏
驚起畫樓人睡銀屏十二歎塵滿絲簧暗消金翠可恨

風流故人迢遞隔千里
相思情緒最苦舊歡無續處
魂夢空費斷鴈無情離鸞有恨空想吳山越水花憔玉
悴但翠黛愁橫紅鉛淚洗待剪江梅倩誰傳此意

方千里

三衢人有
和清真詞

齊天樂

碧紗窓外黃鸝語聲聲似愁春晚岸柳飄綿庭花墮雪
惟有平蕪如剪重門向掩看風動疎簾浪鋪湘簟暗想
前歡舊遊心事寄詩卷
鱗鴻音信未覩夢魂尋訪後

關山又隔無限客館愁思天涯倦跡幾許良宵展轉閒
情意遠記密閣深閨繡衾羅薦睡起無人料應眉黛斂

塞垣春

和周清真

四遠天垂野向晚景雕鞍卸吳藍滴草塞綿藏柳風物
堪畫對雨收霧霽初晴也正陌上烟光灑聽黃鸝啼紅
樹短長音如寫懷抱幾多愁年時趁歡會幽雅盡日
足相思奈春晝難夜念征塵滿堆襟袖那堪更獨游花
陰下一別鬢毛減鏡中霜滿把

醜奴兒

凌波臺畔花如剪，幾點吳霜。烟淡雲黃，東閣何人見晚。
妝江南春近，書千里誰寄清香。別墅橫塘，鼓角聲中
又夕陽。

迎春樂

紅深綠暗春無跡，芳心蕩冶。遊客記搖鞭，跋馬銅駝陌。
凝睇認珠簾側，絮滿愁城風卷白。遞多少相思消息。
何處約歡期，芳草外、高樓北。

汪暉

字處微績溪人開禧中一至闕下不就舉試而歸棲隱山中卒里人私謚曰康範先生

蝶戀花

秋夜簡趙尉

午夜涼生風小住銀漢無聲雲約疎星度佳客欲眠知
未去對牀只欠蕭蕭雨素月四更山外吐酒醒衾寒
消盡沉烟縷料想玉樓人倚處歸帆日斂烟中浦

尹煥

字惟曉山陰人官左司有梅津集

霓裳中序第一

茉莉

青顰粲素靨海國仙人偏耐熱殢盡風香露屑便萬里

凌空肯憑蓮葉盈盈步月悄似憐輕去瑤闕人何在憶
渠癡小點點愛清絕 愁絕舊遊輕別忍重看瑣香金
篋淒涼清夜簟第杳杳詩魂真化風蝶冷香清到骨夢
十里梅花霽雪歸來也懨懨心事自共素娥說

唐多令

吳興
席上

蘋末轉清商溪聲供夕涼緩傳杯催喚紅妝斜綰烏雲
新浴罷裙拂地水沉香 歌短舊情長重來驚鬢霜悵
綠陰青子成雙說著前歡佯不記
一作
係 颺蓮子打鴛鴦

周公謹云可與杜牧
之尋芳較晚為偶

馮取洽

字熙之延平人
自號雙溪翁

蝶戀花

和玉
林韻

秋到雙溪溪上樹葉葉涼聲未省來何許
盡拓溪樓窓與戶倚欄清夜窺河鼓
那得吟朋同此住獨對秋芳
欲寄花無處杖屨相從曾有語
未來先自愁君去

摸魚兒

和玉
林韻蓋為遺
蛻山中桃花作

歎劉郎那回輕別霏霏三落紅
雨玄都觀裏應遺恨一

抹淡烟殘縷愁望處想霧暗雲深忘却來時路新花舊
主記刻羽流商裁紅剪翠山徑日將暮空枝上時有
幽禽對語聲聲如問來否人生行樂須聞健衰老念誰
免此吾所與在溪上深深錦繡花千塢何時定去但對
酒思君呼兒為我頻唱小桃句

陳以莊

字敬叟建安
人有月溪集

水龍吟

錢塘
記恨

晚來江濶潮平越船吳榜催人去稽山滴翠胥濤濺恨

一襟離緒訪柳章臺問桃仙浦物華如故向秋娘渡口
秦娘橋畔依稀是相逢處窈窕青門紫曲舊羅新衣
翻金縷舊音恍記輕攏慢撚哀絃危柱金屋難成阿嬌
已遠不堪春暮聽一聲杜宇紅殷綠老雨花風絮

盧

炳

字叔陽有哄
堂詞一卷

謁金門

春寂寂節物又催寒食樓上捲簾雙燕入斷魂愁似織
門外雨餘風急滿地落英紅濕好夢驚回無處覓天

涯芳草碧

又

春事寂苦荀鮪魚初食風捲繡簾飛絮入柳絲縈似織
迅速韶光去急雨過綠陰尤濕回首舊遊何處覓遠

山空佇碧

點絳脣

過眼溪山向來都是經行處驂鸞人去冷落吹簫侶

小立江亭愁對蒹葭浦無情緒酒杯慵舉閒看江楓舞

踏莎行

秋色人家夕陽洲渚西風催過黃華渡江烟引素忽飛
來水禽破暝雙雙去奔走紅塵棲遲羈旅斷腸猶憶
江南句白雲低處鴈回峯明朝便踏瀟湘路

沈端節

字約之吳興人
有克齋詞一卷

虞美人

去年寒食初相見花上雙飛燕今年寒食又花開垂下
重簾不許燕歸來隔簾聽燕呢喃語似說相思苦東

君都不管閒愁一任落花飛絮兩悠悠

潘 枋

初名公筠夢南臺人持方牛首與之遂易名
字庭堅閩縣人端平初進士通判潭州有紫

巖集

羽仙歌

雕簷綺戶倚晴空如畫曾是吳王舊臺榭自浣紗人去
後落日平蕪行雲斷幾見花開花謝淒涼闌檻外一
簇青山多少圖王共爭霸莫閒愁金杯潑灩對酒當歌
歡娛地夢中興亡休話漸倚遍西風晚潮生明月裏鷺

鷺背人飛下

馮艾子

字偉壽號雲月雙溪子

黃叔暘云偉壽精于律呂詞多自製腔

春風嫋娜

被梁間雙燕話盡春愁朝粉謝午花柔倚紅欄故與蜨
圍蜂遶柳綿無數飛上搔頭鳳管聲圓蠶房香煖笑挽
羅衫須少留隔院蘭馨趁風遠鄰牆桃影伴烟收些
子風情未減眉頭眼尾萬千事欲說還休薔薇露一作刺

牡丹毬慙懃記省前度綢繆夢裏飛紅覺來無覓望中

新綠別後空稠相思難偶歎無情明月今年已是

一作見

三度如鉤

黃昇

一作昇字叔暘號玉林有散花菴詞一卷胡季直云玉林蚤棄科舉雅意讀書間從吟詠

自適游愛齋嘗稱其詩為晴空冰柱樓秋房聞其與魏菊莊友善併以泉石清士目之

月照梨花

書景方永重簾花影好夢猶酣鶯聲喚醒門外風絮交
飛送春歸 脩蛾畫了無人問幾多別恨淚洗殘妝粉

不知嘶馬何處烟草萋迷鷓鴣啼

醉江月

題玉林

玉林何有有一彎蓮沼數間茅宇斷塹疎籬聊補葺那
得粉牆朱戶禾黍西風雞豚曉日活脫田家趣客來茶
罷自挑野菜同煮多少甲第連雲十眉環座人醉黃
金塢回首邯鄲春夢破零落珠歌翠舞得似衰翁蕭然
陋巷長作溪山主紫芝可採更尋岩谷深處

又

西風解事為人間洗盡三庚煩暑一枕新涼宜客夢飛
入藕花深處冰雪襟懷琉璃世界夜氣清如許劃然長
嘯起來秋滿庭戶應笑楚客才高蘭成愁悴遺恨傳
千古作賦吟詩空自好不直一盃秋露淡月闌干微雲
河漢耿耿天催曙此情誰會梧桐葉上疎雨

鵲橋仙

青林雨歇珠簾風細人在綠陰庭院夜來能有幾多寒
已瘦了梨花一半寶釵無據玉琴難托合造一襟幽

怨雲窓霧閣事茫茫試與問杏梁雙燕

文及翁

字時學號本心綿州人歷官參知政事

賀新涼

遊西湖有感

一勺西湖水渡江來百年歌舞百年酣醉回首洛陽花
石盡烟渺黍離之地更不復新亭墮淚簇樂紅妝搖畫
舫問中流擊楫何人是千古恨幾時洗余生自負澄
清志更有誰磻溪未遇傅巖未起國事如今誰倚仗衣
帶一江而已便都道江神堪恃借問孤山林處士但掉

頭笑指梅花藥天下事可知矣

李芸子

字耘叟號芳
州昭武人

木蘭花慢

占西風早處一番雨一番秋記故國斜陽去年今日落
葉林幽悲歌幾回激烈寄疎狂酒令與詩籌遺恨清商
易改多情紫燕難留嗟休觸緒繭絲抽舊事續何由
奈予懷渺渺羈愁鬱鬱歸夢悠悠生平不如老杜便如
他飄泊也風流寄語庭柯徑菊甚時得棹孤舟

嚴

羽

字儀卿樵川人
自號滄浪逋客

滿江紅

送廖叔
仁赴闕

日近觚稜秋漸滿
蓬萊雙闕正錢塘
江上潮頭如雪把
酒送君天上去
瓊琚玉佩鵷鴻列
丈夫兒富貴等浮雲
看名節
天上事吾能說
今老矣空凝絕
對西風慷慨
唾壺歌缺
不灑世間兒女淚
難堪親友中年別
問相思
他日鏡中看
蕭蕭髮

李廷忠

字居厚號橘山
有樂府一卷

生查子

薔薇

玉女翠帷薰香粉開妝面不是占春遲羞被羣花見
纖手纖柔條絳雪飛千片流入紫金卮未許停歌扇

王以寧

字周士長沙人歷官宣撫司參謀制置襄鄧

水調歌頭

裴公亭懷古

歲歲橘洲上老葉舞愁紅西山光翠依舊影落酒盃中
人在子亭高處下望長沙城郭獵獵酒帘風遠水湛寒
碧獨釣綠蓑翁懷往事追昨夢轉頭空孫郎前日豪

健頤指五都雄起擁奇才劍客十萬銀戈赤幘歌鼓壯
軍容何似裴相國談道老圭峯

詞綜卷十八

欽定四庫全書薈要卷二萬八百十七

集部

詞綜卷十九

翰林院檢討朱彝尊編

宋詞六十六首

吳文英

四十
五首

蔣捷

二十
一首

吳文英

字君特四明人從吳毅夫遊
有夢窓甲乙丙丁稿四卷

張叔夏云吳夢窓如七寶樓臺眩人眼目拆
碎下來不成片段尹惟曉云求詞于吾宋

前有清真後有夢窓此非予之言四海之公
言也沈伯時云夢窓深得清真之妙但用

事下語太晦
處人不易知

倦尋芳

錢周糾
定夫

暮帆挂雨冰岸飛梅春思零亂送客將歸偏是故宮離
苑醉酒曾同涼月舞尋芳還隔紅塵面去難留悵芙蓉
路窄綠楊天遠便繫馬鶯邊清曉烟草晴花沙潤香
軟爛錦年華誰念故人遊倦寒食相思堤上路行雲應
在孤山畔寄新吟莫空回五湖春鴈

又

花翁遇舊歡吳門老妓
李憐邀分韻同賦此詞

墜瓶恨井塵鏡迷樓空閒孤燕寄別崔薇清瘦畫圖春

面不約舟移楊柳繫有緣人映桃花見敘分攜悔香癡
謾熱綠鬟輕剪聽細語琵琶幽怨客鬢蒼華衫袖濕
徧漸老芙蓉猶自帶霜重看一縷情深朱戶掩兩痕愁
起青山遠被西風又驚吹夢雲分散

又上元

海霞倒影空霧飛香天市催晚暮靨宮梅相對畫樓簾
捲羅襪輕塵花笑語寶釵爭掩春心眼亂簫聲正風柔
柳弱舞肩交燕念窈窕東鄰深巷燈外歌沉月上花

淺驚夢離雲點點漏壺清怨珠絡香消空念往紗窓人
老羞相見漸銅壺閉春陰曉寒人倦

燭影搖紅

餞馮深居翼
日深居初度

飛蓋西園晚秋恰勝春天氣霜花開盡錦屏空紅葉新
裝綴時放清杯泛水暗淒涼東風舊事夜吟不就松影
闌干月籠寒翠莫唱陽關但憑彩袖歌千歲秋星入
夢隔明朝十載吳宮會一棹回潮渡葦正西窓燈花報
喜柳蠻櫻素試酒爭憐不教不醉

法曲獻仙音

和丁宏庵韻

落葉霞翻敗窓風咽暮色淒涼深院瘦不關秋淚緣生
別情銷鬢霜千點悵翠冷搔頭燕那能語恩怨紫簫
遠記桃枝向隨春渡愁未洗鉛水又將恨染粉縞澀離
箱忍重拈燈夜裁剪望極藍橋彩雲飛羅扇歌斷料鸚
籠玉鎖夢裏隔花時見

憶舊游

別黃澹翁

送人猶未苦苦送春隨人去天涯片紅都飛盡陰陰潤

綠暗裏啼鴉賦情頓雪雙鬢飛夢逐塵沙歎病渴淒涼
分香瘦減兩地看花 西湖斷橋路想繫馬垂楊依舊
欹斜葵麥迷烟處問離巢孤燕飛過誰家故人為寫深
怨空壁掃秋蛇但醉上吳臺殘陽草色歸思賒

點絳脣

懷蘇州

明月茫茫夜來應照南橋路夢遊熟處一枕啼秋雨
可惜人生不向吳城住心期誤鴈將秋去天遠青山暮

又

試燈夜
初晴

捲盡愁雲素娥臨夜新梳洗暗塵不起酥潤凌波地

輦路重來彷彿燈前事情如水小樓薰被春夢笙歌裏

又

推枕南窓棟花寒入單紗淺雨簾不捲空礙調雛燕

一握柔葱香染榴巾汗音塵斷畫羅間扇山色天涯遠

又

時霎清明載花不過西園路嫩陰綠樹正是春留處
燕子重來往事東流去征衫貯舊寒一縷淚濕風簾絮

西子妝

夢窓自度腔湖
上清明薄遊

流水麴塵艷陽醅酒畫舸遊情如霧笑拈芳草不知名
乍凌波斷橋西塊垂楊謾舞總不解將春繫住燕歸來
問綵繩纖手如今何許歡盟誤一箭流光又趁寒食
去不堪衰鬢著飛花傍綠陰冷烟深樹玄都秀句記前
度劉郎曾賦最傷心一片孤山細雨

唐多令

何處合成愁離人心上秋縱芭蕉不雨也颼颼都道晚

涼天氣好有明月怕登樓
年事夢中休花空烟水流

燕辭歸客尚淹留垂柳不縈裙帶住謾長是繫行舟

張叔

夏云此詞疎快不質實

玉漏遲

中秋

鴈邊風訊小飛瓊望杳碧雲先晚露冷闌干定怯藕絲
冰腕淨洗浮雲片玉勝花影春燈相亂秦鏡滿素娥未
肯分秋一半
每圓處即良宵甚此夕偏饒對歌臨怨
萬里嬋娟幾許霧屏雲幔孤兔淒涼照水曉風起銀河

西轉摩淚眼瑤臺夢回人遠

祝英臺近

除夜
立春

剪紅情裁綠意花信上釵股殘日東風不放歲華去有
人添燭西窓不眠侵曉笑聲轉新年鶯語舊樽俎玉
纖曾擘黃柑柔香繫幽素歸夢湖邊還迷鏡中路可憐
千點吳霜寒銷不盡又相對落梅如雨

又

春日客龜
溪游廢園

采幽香巡古苑竹冷翠微路鬪草溪根沙印小蓮步自

憐兩鬢清霜一年寒食又身在雲山深處 晝閒度因
甚天也慳春輕陰便成雨綠暗長亭歸夢趁風絮有情
花影闌干鶯聲門徑解留我霎時凝竚

又上元

晚雲開朝雪霽時節又燈市夜約遺香南陌少年事笙
簫一片紅雲飛來海上繡簾捲綰桃春起 舊遊地素
娥城闕年年新妝起羅綺玉練冰輪無塵浣流水曉霞
紅處啼鴉良宵一夢畫堂正日長人睡

霜花腴

重陽前一
日汎石湖

翠微路窄醉晚風憑誰為整敬冠霜飽花腴燭銷人瘦
秋光做也都難病懷強寬恨鴈聲偏落歌前記年時舊
宿淒涼暮烟秋雨野橋寒 妝壓鬢英爭艷度清商一

曲暗墜金蟬芳節多陰蘭情稀會晴暉稱拂吟箋更移
畫船引珮環邀下嬋娟算明朝未了重陽紫萸應耐看

喜遷鶯

同丁基仲過希
道家看牡丹

凡塵流水正春在絳闕瑤階十二暖日明霞天香盤錦

低映曉光梳洗故苑浣花沉恨化作天紅斜紫困無力
倚闌干還倩東風扶起 公子留意處羅蓋牙籤一一
花名字小扇翻歌密圍留客雲葉翠溫羅綺灩潏紫金
盃重人倚妝臺微醉夜和露剪殘枝點點花心清淚

又
福山蕭
寺歲除

江亭年暮趁飛鴈又聽數聲柔櫓藍尾杯單膠牙餠淡
重省舊時羈旅雪舞野梅籬落寒擁漁家門戶晚風峭
做初番花信春還知否 何處園艷冶紅燭畫堂博簷

良宵午誰念行人愁先芳草輕送年華如羽自剔短檠
不睡空索彩桃新句便歸好料鶯黃已染西池千縷

聲聲慢

閨重九
飲郭園

檀欒金碧婀娜蓬萊遊雲不蘸芳洲露柳霜蓮十分點
綴殘秋新彎畫眉未穩似含羞低度牆頭愁送遠駐西
臺車馬共惜臨流知道池亭多宴掩庭花長是驚落
秦謳膩粉闌干猶聞凭袖香留輸他翠漣拍甃瞰新妝
終日凝眸簾半捲帶黃花人在小樓

又

餞魏繡使泊吳江為友人賦

旋移輕鷁淺傍垂虹還因送客遲留淚雨橫波遙山眉
上新愁行人倚欄心事問誰知只有沙鷗念聚散幾楓
丹霜渚萼綠春洲漸近香菰吹黍想紅絲織字未遠
青樓寂寞漁鄉爭如連醉溫柔西窓夜深剪燭夢頻生
不放雲收共悵望認孤烟起處是舟

高陽臺

落梅

宮粉彫痕仙雲墮影無人野水荒灣古石埋香金沙鎖

骨連環南樓不恨吹橫笛恨曉風千里關山半飄零庭
上黃昏月冷闌干壽陽宮裏愁鸞鏡問誰調玉髓暗
補香瘢細雨歸鴻孤山無限春寒離魂難倩招清些夢
縞衣解珮溪邊最愁人啼鳥清明葉底清圓

又

樓豐樂

脩竹凝妝垂楊駐馬憑欄淺畫成圖山色誰題樓前有
鴈斜書東風緊送斜陽下弄舊寒晚酒醒餘自消凝能
幾花前頓老相如傷春不在高樓上在燈前敲枕雨

外熏爐怕艤遊船臨流可奈清癯飛紅若到西湖底攪
翠瀾總是愁魚莫愁來吹盡香綿淚滿平蕪

滿江紅

澱山湖

雲氣樓臺分一派滄浪翠蓬開小景玉盆寒浸巧石盤
松風送流花時過岸浪搖晴棟欲飛空算鮫宮祇隔一
紅塵無路通神女驚凌曉風明月低響丁東對兩蛾
猶鎖怨綠烟中秋色未教飛盡鴈夕陽長是墜疎鐘又
一聲欸乃過前岩移釣篷

遶佛閣

暗塵四斂樓觀迥出高映孤館清漏將短厭聞夜久籤
聲動書幔桂花又滿閒步露草偏愛幽遠花氣清婉望
中迤邐城陰度河岸倦客最蕭索醉倚斜陽穿柳綫
還似汴隄虹梁橫水面看浪颺春燈舟下如箭此行重
見歎故友難逢羈思空亂兩眉愁向誰舒展

解語花

梅花

門橫皴碧路入蒼烟春近江南岸暮寒如剪臨溪影一

一半斜清淺飛雲弄晚蕩千里暗香平遠端正看瓊樹
三枝總似蘭昌見 酥瑩雲容夜暖伴蘭翹清瘦蕭鳳
柔婉冷雲荒翠幽棲久無語暗申春怨東風半面料準
擬何郎詩卷歡未闌烟雨青黃宜晝陰庭館

荔支香近

七夕

輕睡時聞晚鵲噪庭樹又說今夕天津西畔重歡遇蛛
絲暗鎖紅樓燕子穿簾處天上未比人間更情苦 秋
鬢改妒月姊長眉嫵過雨西風數葉井梧秋舞夢入藍

橋幾點疎星映朱戶淚濕沙邊凝竚

尉遲杯

賦楊公
小蓬萊

垂楊逕洞鑰啟時遣流鶯迎涓涓暗谷流紅應有緗桃
千頃臨池笑靨春色滿銅華弄妝影記年時試酒湖陰
褪花曾采新杏蛛窓繡網玄經纔石研開奩雨潤雲
凝小小蓬萊香一掬愁不到朱嬌翠靚清樽伴人間日
永斷琴和棋聲竹露冷笑從前醉卧紅塵不知仙在人
境

霜葉飛

重九

斷烟離緒關心事斜陽紅隱霜樹半壺秋水薦黃花香
嘆西風雨縱玉勒輕飛迅羽淒涼誰弔荒臺古記醉踏
南屏彩扇咽寒蟬倦夢不知蠻素聊對舊節傳杯塵
箋蠹管斷闕經歲慵賦小蟾斜影轉東籬夜冷殘蛩語
早白髮緣愁萬縷驚颺從捲烏紗去謾細將茱萸看但
約明年翠微高處

瑞鶴仙

淚荷拋碎壁正漏雲篩雨斜捎窓隙林聲怨秋色對小山不送寸眉愁碧涼欺岸幘暮砧催銀屏剪尺最無聊燕去堂空舊幕暗塵羅額行客西園有分斷柳淒花似曾相識西風破屐林下路水邊石念寒蛩殘夢歸鴻心事那聽江村夜笛看雪飛蘋底蘆梢未如鬢白

又

贈道女陳華
山內夫人

彩雲棲翡翠聽鳳笙吹下飛軒天際晴霞翦輕袂澹春姿雪態寒梅清泚東皇有意旋安排闌干十二早不知

為雲為雨盡日建章門閉
堪比紅綃纖素紫燕輕盈
內家標致游仙舊事星斗下夜香裏有華峰瘦影紙屏
橫幅春色長供午睡更醉乘玉井秋風采花弄水

齊天樂

新烟初試花如夢疑收楚峰殘雨茂苑人歸秦樓燕宿
同惜天涯為旅遊情最苦早柔綠迷津亂莎荒圃數樹
梨花晚風吹墮半汀鷺流紅江上去遠翠樽曾共醉
雲外別墅淡月秋千幽香巷陌愁結傷春深處聽歌看

舞駐不得當時柳蠻櫻素睡起懨懨洞簫誰院宇

又

烟波桃葉西陵路十年斷魂潮尾古柳重攀輕鷗驟別
陳迹危亭獨倚涼颼乍起渺烟磧飛帆暮山橫翠但有
江花共臨秋鏡照憔悴華堂燭暗送客眼波回盼處
芳艷流水素骨凝冰柔葱蘸雪猶憶分瓜深意清樽未
洗夢不濕行雲謾沾殘淚可惜秋宵亂蛩疎雨裏

掃花遊

送春古
江村

水園沁碧驟夜雨飄紅竟空林島艷春過了有塵香墜
鈿尚遺芳草步繞新陰漸覺交枝逕小醉深窈愛綠葉
翠圓勝看花好芳架雪未掃怪翠被佳人困迷清曉
柳絲繫棹問閭門自古送春多少倦蜨慵飛故撲簪花
破帽酹殘照掩重城暮鐘不到

瑞龍吟

德清清
明競渡

大溪面遙望繡羽衝烟錦梭飛練桃花三十六陂鮫宮
睡起嬌雷乍轉去如箭催趁戲旗遊鼓素瀾雪濺東

風冷濕鮫腥淡陰送晝輕霏弄晚
洲上青蘋生處鬪
春不管懷沙人遠殘日半開一川花影零亂山屏醉顚
連掉東西岸闌干倒千紅妝靨鉛香不斷傍暝疎簾捲
翠連皺淨笙歌未散算柳嬌桃嬾猶自有玉龍黃昏吹
怨重雲暗閣春霖一片

解蹀躞

醉雲又兼醒雨楚夢時來往倦蜂剛著梨花惹游蕩還
做一段相思冷波葉舞愁紅送人雙漿
暗凝想情共

天涯秋黯朱橋鎖深巷會稀投得輕分頓惆悵此去幽
曲誰來可憐殘照西風半妝樓上

玉樓春

京市舞女

茸茸狸帽遮梅額金蟬羅剪胡衫窄乘肩爭看小腰身
倦態強隨閒鼓笛問稱家住城東陌欲買千金應不
惜歸來困頓殢春眠猶夢婆娑斜趁拍

澡蘭香

淮安重午

盤絲繫腕巧篆垂簪玉隱紺紗睡覺銀瓶露井彩簾雲

窓往事少年依約為當時曾寫榴裙傷心紅綃褪萼黍
夢光陰漸老汀洲烟弱莫唱江南古調怨抑難招楚
江沉魄薰風燕乳暗雨梅黃午鏡澡蘭簾幕念秦樓也
擬人歸應剪菖蒲自酌但悵望一縷新蟾隨人天角

惜紅衣

余從姜石帚遊苕霅間三十五年矣重來傷今感昔聊以詠懷

鷺老秋絲蘋愁暮雪鬢那太白倒柳移栽如今暗溪碧
烏衣細語傷伴惹茸紅曾約南陌前度劉郎尋流花踪
跡朱樓水側雪面波光汀蓮沁顏色當時醉近繡箔

夜吟寂三十六磯重到清夢冷雲南北買釣舟溪上應
有烟簑相識

風入松

聽風聽雨過清明愁草瘞花銘樓前綠暗分攜路一絲
柳一寸柔情料峭春寒中酒交加曉夢啼鶯西園日
日掃林亭依舊賞新晴黃蜂頻撲秋千索有當時纖手
香凝惆悵雙鴛不到幽塔一夜苔生

鶯啼序

殘寒正欺病酒掩沉香繡戶燕來晚飛入西城似說春
事遲暮畫船載清明過却晴烟冉冉吳宮樹念羈情遊
蕩隨風化為輕絮 十載西湖傍柳繫馬趁嬌塵軟霧
遡紅漸招入仙溪錦兒偷寄幽素倚銀屏春寬夢窄斷
紅濕歌紈金縷暝堤空輕把斜陽總還鷗鷺 幽蘭旋
老杜若還生水鄉尚寄旅別後訪六橋無信事往花萎
瘞玉埋香幾番風雨長波妒眇遙山羞黛漁燈分影春
江宿記當時短楫桃根渡青樓彷彿臨分敗壁題詩淚

墨慘淡塵土 危亭望極草色天涯歎鬢侵半亭暗點
檢離痕歡唾尚染鮫綃彈鳳迷歸破鸞慵舞殷勤待寫
書中長恨藍霞遼海沈過鴈謾相思彈入哀箏柱傷心
千里江南怨曲重招斷魂在否

玉漏遲

絮花寒食路晴絲罥日綠陰吹霧客帽欺風愁滿畫船
烟浦綵挂秋千散後悵塵鎖燕簾鶯戶從間阻夢雲無
準鬢霜如許 夜久繡閣藏嬌記掩扇傳歌剪燈留語

月約星期細把花鬚頻數彈指一襟怨恨謾空倩啼鵲
聲訴深院宇黃昏杏花微雨

金盞子

吳城連日賞桂一夕風雨悉已零落獨寓
窓晚花方作小蕾未及見開遂有新色之
役竭來西館離落間嫣然一枝
可愛見似人而喜為賦此解

賞月梧園恨廣寒宮樹曉風搖落莓砌掃蛛塵空腸斷
薰爐燼消殘萼殿秋尚有餘花鎖烟窓雲幄新鴈又無
端送人江上短亭初泊籬角夢依約人一笑惺忪翠
袖薄悠然醉魂喚醒幽叢畔淒香霧雨漠漠晚吹乍顫

秋聲早屏空金雀明朝想猶有數點蜂黃伴我斟酌

絳都春

余往來清華池館六年賦咏屢以感昔傷今益不堪懷乃復作此解

春來鴈渚弄艷冶又入垂楊如許困舞瘦腰啼濕宮黃
池塘雨碧沿蒼蘚雲根路尚追想凌波微步小樓重上
憑誰為唱舊時金縷凝竚烟蘿翠竹欠羅袖為倚天
寒日暮強醉梅邊招得花奴來樽俎東風須惹春雲住
更莫把飛瓊吹去便教攜取熏籠夜溫繡戶

十二郎

垂虹橋上有垂虹亭屬吳江

素天際水浪拍碎凍雲不凝記曉葉題霜秋燈吟雨曾
繫長橋過艇又是賓鴻重來後猛賦得歸期纔定嗟繡
鴨解言香鑪堪釣尚廬人境幽興爭如共載月娥妝
鏡念倦客依前貂裘茸帽重向淞江照影酹酒蒼茫倚
歌平遠亭上玉虹腰冷迎醉面暮雪飛花幾點黛愁山
暝

蔣

捷

字勝欲義興人
有竹山詞一卷

賀新郎

渺渺啼鴉了。亘魚天、寒生峭嶼。五湖秋曉。竹几一鐙人。
做夢嘶馬誰行。古道起搔首。窺星多少。月有微黃籬。無
影挂牽牛數朶。青花小秋太淡。添紅棗。愁痕倚賴。西
風掃被。西風翻催鬢。鬢與秋俱老。舊院隔霜簾。不捲金
粉屏邊。醉倒計無此。中年懷抱。萬里江南。吹簫恨恨參
差白鴈。橫天杪烟未歛。楚山杳。

又

約友三
月旦飲

鴈嶼晴嵐薄。倚層屏、千樹高低。粉纖紅弱。雲隘東風藏。

不盡吹艷生香萬壑又散入汀蘅洲
葯擾擾匆匆塵土面看歌鶯舞燕逢
春樂人共物知誰錯寶釵樓上圍
簾幕小嬋娟雙調彈箏半霄鸞鶴我
輩中人無此分琴思詩情當却也勝
似愁橫眉角芳景三分才過二便綠
陰門巷楊花落沽斗酒且同酌

又

夢冷黃金屋歎秦箏斜鴻陣裏素絃
塵撲化作嬌鶯飛歸去猶認窓紗舊
綠正過雨荊桃如菽此恨難平君知

否似瓊臺湧起彈碁局消瘦影嫌明燭
鴛樓碎瀉東西玉問芳踪何時再展翠釵難卜
待把宮眉橫雲樣描上生綃畫幅怕不是新來妝束
綵扇紅牙今都在恨無人解聽開元曲空掩袖倚寒竹

洞仙歌

對雨
思友

世間何處最難忘杯酒惟是停雲想親友此時無一盞
千種離愁西風外長伴枯荷衰柳去年深夜語傾倒
書窓窓燭心懸小紅豆記得到門時雨正蕭蕭嗟今雨

此情非舊待與子相期采黃花又未卜重陽果能晴否

又柳

枝枝葉葉受東風調弄便是鶯穿也微動自鶯黃千縷
數到飛綿閒無事誰管將春迎送輕柔心性在教得
遊人酒舞花吟恣狂縱更誰家鸞鏡裏貪學纖蛾移來
傍妝樓新種總不道江頭鎖清愁正雨渺烟茫翠陰如
夢

瑞鶴仙

鄉城
見月

紺烟迷鴈跡漸碎鼓零鐘街喧初息風檠背寒壁放冰
蜍飛到蛛絲簾隙瓊魂暗泣念鄉關霜蕪似織謾將身
化鶴歸來忘却舊遊端的歡極蓬壺渠浸花院梨溶
醉連春夕柯雲罷夾櫻桃在夢難覓勸清光乍可幽窓
相伴休照紅樓夜笛怕人間換譜伊涼素娥未識

白苧

正春晴又春冷雲低欲落瓊苞未剖早是東風作惡旋
安排一雙銀蒜鎮羅幕幽壑水生漪皺嫩綠潛鱗初躍

惓惓門巷桃樹紅纔約略知甚時霽華烘破青青萼
憶昨引蛺蝶花邊近來重見身學垂楊瘦削問小翠眉山
為誰攢却斜陽院宇任蛛絲罥徧玉箏絃索戶外惟聞
放剪刀聲深在妝閣料想裁縫白苧春衫薄

女冠子

元夕

蕙花香也雪晴池館如畫春風飛到寶釵樓上一片笙
簫琉璃光射而今燈謾挂不是暗塵明月那時元夜況
年來心嬾意怯羞與蛾兒爭耍 江城人悄初更打問

繁華誰解再向天公借
剔殘紅
爇但夢裏隱隱鈿車羅
帕吳箋銀粉研待把舊家風景寫成閒話
笑綠鬟鄰女
倚窓猶唱夕陽西下

永遇樂

綠陰

清逼池亭潤侵山閣
雲氣凝聚未有蟬前已無蜨
後花
事隨逝水西園支徑今朝重到半礪醉筇吟袂除非是
鶯身瘦小暗中引雛穿去
梅簷滴溜風來吹斷放得
斜陽一縷
玉子敲枰香綃落剪聲度深幾許層層離恨

淒迷如此點破謾煩輕絮應難認爭春舊館倚紅杏處

高陽臺

送翠英

燕捲晴絲蜂黏落絮天教綰住閒愁閒裏清明匆匆粉
澀紅羞燈搖縹暈茸窓冷語未闌娥影分收好傷情春
也難留人也難留芳塵滿目悠悠為問縈雲珮響還
繞誰樓別酒纔斟從前心事都休飛鶯縱有風吹轉奈
舊家苑已成秋莫思量楊柳灣西且櫂吟舟

絳都春

春愁怎盡正鶯背帶綠酴醾花謝細雨院深淡月廊斜
重簾挂歸時記約燒燈夜早拆盡千秋紅架縱然歸近
風光又是翠陰初夏 姹姪嚙青泣白恨玉珮罷舞芳
塵凝榭幾擬倩人付與香蘭秋羅帕知他墮策斜攏馬
在底處垂楊樓下無言暗擁嬌鬟鳳釵溜也

聲聲慢

秋聲

黃花深巷紅葉低窓淒涼一片秋聲豆雨聲來中間夾
帶風聲疎疎二十五點麗譙門不鎖更聲故人遠問誰

搖玉佩簷底鈴聲
彩角聲吹月墮漸連營馬動四起
笳聲閃爍鄰燈燈前尚有砧聲知他訴愁到曉碎嚶嚶
多少蛩聲訴未了把一半分與鴈聲

金盞子

練月縈窓夢乍醒黃花翠竹庭館心字夜香消人孤另
雙鶉被他羞看擬待告訴天公減秋聲一半無情鴈正
用恁時飛來叫雲尋伴猶記杏櫳煖銀燭下纖影卸
佩款春渦暈紅豆小鶯衣嫩珠痕澹印芳汗自從信誤

青鸞想寵鵑停喚風刀快但剪畫簷梧桐怎剪愁斷

梅花引

白鷗問我泊孤舟是身留是心留心若留時何事鎖眉
頭風拍小簾燈暈舞對閒影冷清清憶舊遊舊遊舊
遊今在否花外樓柳下舟夢也夢也夢不到寒水空流
漠漠黃雲濕透木綿裘都道無人愁似我今夜雪有梅
花似我愁

解佩令

春晴也好春陰也好著些兒春雨越好春雨如絲繡出
花枝紅裊怎禁他孟婆合皂 梅花風悄杏花風小海
棠風驀地寒峭歲歲春光被二十四風吹老棟花風爾
且慢到

虞美人

聽雨

少年聽雨歌樓上紅燭昏羅帳壯年聽雨客舟中江濶
雲低斷鴈叫西風而今聽雨僧廬下鬢已星星也悲
歡離合總無情一任階前點滴到天明

又 梳樓

絲絲楊柳絲絲雨春在冥濛處樓兒忒小不藏愁幾度
和雲飛去覓歸舟天憐客子鄉關遠借與花消遣海
棠紅近綠闌干纔捲朱簾却又晚風寒

祝英臺近

次韻
惜別

柳邊樓花下館低卷繡簾半簾外天絲擾擾似情亂知
他蛾綠纖眉鵲黃小袖在何處閒遊閒翫最堪歎等
面一寸塵深玉柱網斜鴈譜字紅蕉剪燭記同看幾回

傳語東風將愁吹去怎奈向東風不管

行香子

舟宿
間灣

紅了櫻桃綠了芭蕉送春歸客尚蓬飄昨宵穀水今夜
蘭皋奈雲溶溶風淡淡雨瀟瀟銀字笙調心字香燒
料芳踪乍整還凋待將春恨都付春潮過窈娘堤秋娘
渡泰娘橋

柳梢青

游女

學唱新腔秋千梁上釵股敲雙柳雨花風翠鬆裙褶紅

膩鞋幫 歸來門掩銀缸淡月裏疎鐘漸撞嬌欲人扶

醉嫌人問斜倚樓窓


霜天曉角

折花

人影窓紗是誰來折花折則從他折去知折去向誰家
簷牙枝最佳折時高折些說與折花人道須插向鬢
邊斜



詞綜卷十九



總校官庶吉士臣張能照
校對官中書臣潘庭筠
膳錄監生臣王永年

欽定四庫全書薈要

集部
詞綜卷二十

詳校官編修臣繆晉



欽定四庫全書蒼要卷二萬八百十八

集部

詞綜卷二十

翰林院檢討朱彝尊編

宋詞七十六首

陳允平

二十首

周

密

五十首

陳允平

字君衡號西麓明州人有日湖漁唱二卷

張叔夏云詞欲雅而正志之所之一為物所役則失其雅正之音近代陳西麓所作平正

亦有

佳者

摸魚兒

西湖送春

倚東風畫欄十二芳陰簾幕低護玉屏翠冷梨花瘦寂
寞小樓烟雨腸斷處悵折柳柔情舊別長亭路年華似
羽任錦瑟聲寒瓊簫夢遠羞對綵鸞舞 文園賦重憶
河橋眉嫵啼痕猶濺紈素丁香共結相思恨空託繡羅
金縷春已暮縱燕約鶯盟無計留春住傷春倦旅趁暗
綠稀紅扁舟短棹載酒送春去

絳都春

鞦韆倦倚正海棠半坼不耐春寒殢雨弄晴飛梭庭院

繡簾閒梅妝欲試芳情懶翠顰愁入眉彎霧蟬香冷霞
綃淚搵恨襲湘蘭悄悄池臺步晚任紅暝杏靨碧沁
苔痕燕子未來東風無語又黃昏琴心不度春雲遠斷
腸難託啼鵲夜深猶倚垂楊二十四欄

酹江月

賦水仙

漢江露冷是誰將瑤瑟彈向雲中一曲清泠聲漸杳月
高人在珠宮暈額黃輕塗腮粉艷羅帶織青葱天香吹
散珮環猶自丁東回首杜若汀洲金鈿玉鏡何日得

相逢獨立飄飄烟浪遠羅襪羞濺春紅渺渺予懷迢迢
良夜三十六陂風九疑何處斷魂飛度千峰

又

霽空虹雨傍啼蜚莎草宿鷺汀洲隔岸人家砧杵急微
寒先到簾鉤步幄塵高征衫酒潤誰煖玉香篝風燈微
暗夜長頻換更籌應是鴈柱調箏鴛梭織錦付與兩
眉愁不似樽前今夜月幾度同上南樓紅葉無情黃花
有恨辜負十分秋歸心如醉夢魂飛赴東流

清平樂

鳳城春淺寒壓花梢顫有約不來梁上燕十二繡簾空
捲去年共倚秋千今年獨倚闌干誤了海棠時候不
成直待花殘

永遇樂

玉腕籠寒翠欄凭曉鶯調新簧暗水穿苔遊絲度柳人
靜芳晝長雲南歸鴈樓西飛燕去來慣認炎涼王孫遠
青青草色幾回望斷柔腸 薔薇舊約樽前一笑等閒

辜負年光鬪草庭空拋梭架冷簾外風絮香傷春情緒
惜花時候日斜尚未成妝聞嬉笑誰家女伴又還採桑
八寶妝

望遠秋平初過雨微茫水滿烟汀亂蒨疎柳猶帶數點
殘螢待月重樓誰共倚信鴻斷續兩三聲夜如何頓涼
驟覺紈扇無情還思驂鸞素約念鳳簫鴈瑟取次塵
生舊日潘郎雙鬢半已星星琴心錦意暗懶又爭奈西
風吹恨醒屏山冷怕夢魂飛度藍橋不成

綺羅香

秋雨

鴈宇蒼寒蛩疏翠冷又是淒涼時候小揭珠簾衣潤唾
花羅綯洗曉鷺獨立衰荷遡歸燕尚棲殘柳想黃華羞
澁東籬斷無新句到重九孤檠清夢易覺腸斷唐宮

舊曲聲迷官漏滴入愁心秋似玉樓人瘦烟檻外催落
梧桐帶西風亂捎鴛鴦記畫簾燈影沉沉共裁春夜韭

探春

蘇堤
春曉

上苑烏啼中洲鷺起疎鐘纔度雲窈篆冷香篝燈微塵

幌殘夢猶吟芳草搔首捲簾看認何處六橋烟柳翠橈
纔艤西泠趁取過湖人少掠水風花繚繞還暗憶年
時旗亭歌酒隱約春聲鈿車寶勒次第鳳城開了惟有
踏青心縱早起不嫌寒峭畫欄閒立東風舊紅誰掃

秋霽

平湖
秋月

千頃玻璃送遠目斜陽漸下林間題葉人歸採菱舟散
望中水天一色碾空桂魄玉繩低轉雲無迹有素鷗閒
伴夜深呼棹過環碧相思萬里頓隔嬋媛幾回瑤臺

同駐鸞翼對西風憑誰問取人間那得有今夕應笑廣
寒宮殿窄露冷烟澹還看數點殘星兩行新鴈倚樓橫
笛

百字令

斷橋
殘雪

凝雲沍曉正藤花纔積荻絮初殘華表翩躚何處鶴愛
吟人正孤山凍解苔鋪水融莎甃誰凭玉勾闌茸衫氈
帽冷香吹上吟鞭 將次柳際瓊消梅邊粉瘦添做十
分寒間踏輕澌來薦菊半潭新漲微瀾水北峯巒城陰

樓觀留向月中看
巖雲深處好風飛下晴湍

掃花遊

雷峰
落照

數峰蘸碧記載酒紺園柳塘花塢最堪避暑愛蓮香送
晚翠嬌紅嫵欵乃菱歌乍起蘭橈競舉日斜處望孤鶩
斷霞初下芳杜遙想山寺古看倒影金輪遡光朱戶
暝烟帶樹有投林鷺宿凭樓僧語可惜流年付與朝鐘
暮鼓謾凝竚步長橋月明歸去

驀山溪

花港
觀魚

春波浮綠小隱桃溪路烟雨正林塘翠不礙錦鱗來去
芹香藻膩偏愛鯉花肥簷影下柳陰中逐浪吹萍絮
宮溝泉滑怕有題紅句釣餌已忘機都付與人間兒女
濠梁興在鷗鷺笑人癡三湘夢五湖心雲水蒼茫處

齊天樂

南屏
晚鐘

赤欄橋畔斜陽外臨江暮山凝紫戲鼓纔停漁榔乍過
一片芙蓉秋水餘霞散綺正銀鑰停關畫橈催艤魚板
敲殘數聲初入萬松裏坡翁詩夢未老翠微樓上月

曾共誰倚御苑烟花宮斜露草幾度西風彈指黃昏盡
也有眠月閒僧醉香遊子驚嶺猿啼喚人吟思起

明月引

和白雲趙宗
簿自度曲

雨餘芳草碧蕭蕭暗春潮蕩雙橈紫鳳青鸞舊夢帶文
簫綽約珮環風不定雲欲墮六銖香天外飄相思為
誰蘭恨銷渺湘魂無處招素紈猶在真真意還倩誰描
舞鏡空懸羞對月明宵鏡裏心心裏月君去矣舊東風
新畫橋

唐多令

吳江道上
寄鄭可大

何處是秋風月明霜露中
算淒涼未到梧桐曾向垂虹
橋上看有幾樹水邊楓
客路怕相逢酒濃愁更濃數
歸期猶是初冬欲寄相思無好句
聊折贈鴈來紅

又

休去採芙蓉秋江烟水空
帶斜陽一片征鴻欲頓閒愁
無頓處都著在兩眉峰
心事寄題紅畫橋流水東斷
腸人無奈秋濃回首層樓歸去
嬾早新月挂梧桐

戀繡衾

細桃紅淺柳褪黃燕初來宮漏漸長任日轉花梢也倚
蘭屏猶未試妝秦鸞舊曲無心理憶年時相傍採桑
聽綠樹嬌鶯囀一聲聲都是斷腸

又

銀鴛金鳳畫暗銷曉簾櫳新翠漸交算多少相思恨被
東風吹上柳梢羅窓夜夜梨花瘦奈月明香夢易遙
便擬倩題紅句趁落花流過謝橋

小重山

岸柳黃深綠漸饒
林塘初雨過漲蒲萄
秋千亭榭彩旗
交鶯聲裏春在杏花梢
慵整翠雲翹眉尖愁兩點倩
誰描斜陽芳草暗魂銷
東風遠猶凭赤欄橋

慶春宮

斜日明霞殘虹分雨軟
風淺掠蘋波聲冷瑤笙情疎寶
扇酒醒無奈秋何彩雲輕散
漫敲缺銅壺浩歌眉痕留
怨依約遙峯學斂雙蛾
銀牀露洗涼柯屏掩香銷忍

埽裯羅楚驛梅邊吳江楓畔庾郎從此愁多草蛩喧砌
料催織回文鳳梭相思遼遠簾卷翠樓月冷星河

垂楊

懷古

銀屏夢覺漸淺黃嫩綠一聲鶯小細雨輕塵建章初閉
東風悄依然千樹長安道翠雲鎖玉窓深窈斷橋人空
倚斜陽帶舊愁多少還是清明過了任烟縷露條碧
纖青嫋恨隔天涯幾回惆悵蘇堤曉飛花滿地誰為掃
甚薄倖隨波縹緲啼鴉不喚春歸人自老

周密

字公謹濟南人僑居吳興自號弁陽嘯翁又號蕭齋有草窓詞二卷一名蘋洲漁笛譜

大聖樂

東園
錢春

嬌綠迷雲倦紅顰曉嫩晴芳樹漸午陰簾影移香燕語
夢回千點碧桃吹雨冷落錦衾歸後記前度蘭橈停翠
浦凭欄久謾凝竚鳳翹慵聽金縷留春問誰最苦柰
花自無言鶯自語對畫樓殘照東風吹遠天涯何許怕
折露條愁輕別更烟暝長亭啼杜宇垂楊晚但羅袖晴
沾飛絮

花犯

水仙花

楚江湄湘娥乍見無言灑清淚淡然春意空獨倚東風
芳思誰記凌波路冷秋無際香雲隨步起謾記漢宮仙
掌亭亭明月底冰絃寫怨更多情騷人恨枉賦芳蘭
幽芷春思遠誰賞國香風味相將共歲寒伴侶小窓淨
沉烟熏翠被幽夢覺涓涓清露一枝燈影裏

探春

脩門度歲

綵勝宜春翠盤消夜客裏暗驚時候剪燕心情呼盧音

語景物總成懷舊愁鬢妒垂楊早穉眼漸濃如豆儘教
寬盡春衫畢竟為誰消瘦 梅浪半空如繡便管領芳
菲忍辜詩酒映竹占花臨窓卜鏡還念歲寒宮袖簫鼓
動春城競點綴玉梅金柳厮勾元宵燈前共誰攜手

瑤花

瓊花

朱鈿寶玦天上飛瓊比人間春別江南江北曾未見謾
擬梨雲梅雪淮山春晚問誰識芳心高潔消幾番花落
花開老了玉關豪傑 金壺剪送瓊枝看一騎紅塵香

度瑤闕韶華正好應自喜初識長安蜂蜨杜郎老矣想
舊事花須能說記少年一夢揚州二十四橋明月

玉京秋

烟水濶高林弄殘照晚蜩淒切碧砧度韻銀牀飄葉衣
濕桐陰露冷採涼花時賦秋雪難輕別一襟幽事砌蛩
能說客思吟商還怯怨歌長瓊壺暗缺翠扇疎紅衣
香褪翻成銷歇玉骨西風恨最恨閒却新涼時節楚簫
咽誰倚西樓淡月

解語花

晴絲罥蜨煖蜜酣蜂重簾卷春寂寂雨萼烟梢壓闌干
花雨染衣紅濕金鞍誤約空極目天涯草色閨苑玉簫
人去後惟有鶯知得餘寒猶掩翠戶梁燕乍歸芳信
未端的淺薄東風莫因循輕把杏鈿狼籍塵侵錦瑟殘
日紅窓春夢窄睡起折枝無意緒斜倚秋千立

曲遊春

湖遊西

禁苑東風外颺煖絲晴絮春思如織燕約鶯期惱芳情

偏在翠深紅隙漠漠香塵隔沸十里亂絲叢笛看畫船
盡入西泠間却半湖春色 柳陌新烟凝碧映簾底宮
眉堤上遊勒輕暝籠烟怕梨雲夢冷杏香愁幕歌管酬
寒食奈蜨怨良宵岑寂正恁醉月搖花怎生去得

秋霽

秋日遊西湖

重到西泠記芳園載酒畫舸橫笛水曲芙蓉渚邊鷗鷺
依依似舊相識年華易失段橋幾換垂楊色謾自惜愁
損庾郎雙鬢點華白 殘蛩露草怨蜨飛花轉眼西風

又陳迹歎如今才情量減樽前辜負醉吟筆欲寄遠情
秋水隔舊遊空在凭高望極斜陽亂山浮紫暮雲凝碧

臺城路

梅

宮簷融暖晨妝懶輕霞未勻酥臉倚竹嬌顰臨溪瘦影
依約樽前重見盈盈笑靨映珠絡玲瓏翠綃葱蒨夢入
羅浮滿衣清露暗香染東風千樹易老怕紅顏旋減
芳意偷變贈遠天寒吟香夜永多少江南新怨瓊梳靜
掩任剪雪裁雲競誇輕艷畫角黃昏夢隨春去遠

又

東風又入江南岸
年年漢宮春
早寶屑無痕
生香有韻
消得何郎花惱
孤山夢繞
記路隔金沙
那回曾到
夜月相思
翠樽誰共
飲香醪
天寒宮怨
贈遠水邊
憑為問
春到多少
竹外凝情
牆陰照影
誰見
嫣然一笑
冷香未
了
怕玉管西樓
一聲霜曉
花自多情
看花人自老

又
赤壁
重遊

清溪數點芙蓉雨
蘋蕩涼泛吟鷁
洗玉空明
浮珠沆瀣

人靜籟沉波息仙潢咫尺想翠羽瓊樓有人相憶天上
人間未知今夕是何夕此生此夜此景自仙翁去後
清致誰識散髮吟商簪花弄水誰伴空江橫笛流年暗
惜怕一度西風井梧吹碧底事閒愁醉歌浮大白

又

曲屏遮斷行雲路西樓怕聽疎雨硯凍凝華香寒散霧
呵筆慵題詩句長安倦旅歎衣染塵痕鏡添秋縷過盡
飛鴻錦箋誰與寄愁去簫臺應是怨別曉寒梳洗懶

依舊眉嫵酒滴爐香花圍坐暖閒却珠鞦鉤柱芳心謾
語恨柳外遊韉繫情何許暗卜歸期細將梅蕊數

又
蟬

槐陰忽送清商怨依稀正聞還歇寫怨聲長危絃調苦
前夢蛻痕枯葉傷情惜別是幾度斜陽幾回殘月轉眼
西風一襟幽恨向誰說輕鬟猶記動影翠蛾應妒我
雙鬢如雪枝冷頻移葉疎猶抱肯負好秋時節淒淒切
切漸迤邐黃昏砌蛩相接露洗餘悲暮烟聲更咽

一枝春

酒邊聞
歌和韻

淡碧春姿柳。眠醒似怯。朝來疎雨芳程乍數。喚起探花
情緒。東風尚淺。甚先有翠嬌紅嫵。應自把羅綺圍春占
得畫屏春聚。留連繡叢深處。愛歌雲裊裊。低隨香縷。
瓊窓夜暖。試與細評新譜。妝眉媚粉。料無奈弄顰佯妒。
還只怕簾外。籠鶯笑人醉語。

又

春晚
和韻

簾影移陰杏。薜寒乍濕。西園絲雨芳期暗數。又是去年

心緒金花謾剪倩誰畫舊時眉嫵空自傷楊柳風流淚
滴軟綃紅聚羅窓那回歌處歎庭花倦舞香銷冰縷
樓空燕冷碎錦懶尋底譜么絃謾賦曾記是倚嬌成妒
深院悄門掩梨花倩鶯寄語

綠蓋舞風輕

白蓮

玉立照新妝翠蓋亭亭凌波步秋漪真色生香明璫搖
淡月舞袖斜倚耿耿芳心奈千縷晴絲縈繫恨開遲不
嫁東風顰怨嬌蓋花底謾卜幽期素手採珠房粉艷

初洗雨濕鉛腮碧雲深暗聚軟綃清淚訪藕尋蓮楚江
遠相思誰寄棹歌回衣露滿身花氣

玲瓏四犯

戲調
夢窓

波暖塵香正嫩日輕陰搖蕩清晝幾日新晴初展綺窓
紋繡年少忍負才華儘占斷艷歌芳酒奈翠簾蜨舞蜂
喧催趁禁烟時候杏腮紅透梅鈿皺燕歸時海棠廝
勾尋芳較晚東風約還約劉郎歸後憑問柳陌情人比
似垂楊誰瘦倚畫欄無語春恨遠頻回首

拜星月

春暮寄
夢窓

膩葉陰清孤花香冷迤邐芳洲春換薄酒孤吟悵相如
遊倦想人在絮幕香簾凝望誤認幾許烟檣風幔芳草
天涯負華堂雙燕記簫聲淡月梨花院砑箋紅謾寫
東風怨一夜花落鶻啼喚四橋吟伴蕩歸心已過江南
岸清宵夢遠逐飛花亂幾千萬絲縷垂楊繫春愁不斷
長亭怨慢

記千竹萬荷深處綠淨池臺翠涼亭宇醉墨題香閒簫

橫玉晝吟趣勝流星聚知幾誦燕臺句零落碧雲空歎
轉眼歲華如許凝佇望涓涓一水夢到隔花窓戶十
年舊事儘消得庾郎愁賦燕樓鶴表半飄零算惟有盟
鷗堪語慢倚遍河橋一片涼雲吹雨

宴清都

雪川圖

老去閒情懶東風外霏霏花絮零亂輕鷗漲綠啼鶉暗
碧一春過半尋芳已是來遲怕迤邐年華暗換還應恨
白雪歌空秋霜鬢冷難管凭欄自笑清狂事隨花謝

愁與春緩持盃顧曲登樓賦筆杜郎才減前歡已隔前
溪但耿耿臨高望眼遡輕紅一棹歸時半蟾弄晚

霓裳中序第一

湘屏展翠疊恨入宮溝流怨葉缸冷金花暗結又鴈影
帶霜蛩音淒月珠寬腕雪歎錦箋芳字盈篋人何在玉
簫舊約忍對素娥說 愁絕衣砧幽咽任帳底沉烟漸
滅紅蘭誰採贈別悵洛浦分綃漢臯遺玦舞鸞光半缺
最怕聽離絃乍闌憑欄久一庭香露桂影弄淒蛩

惜餘春慢

避暑
和韻

紺玉波寬碧雲亭小冉冉水花香細魚牽翠帶燕掠紅
衣雨窓萬荷喧睡臨檻自採瑤房鉛粉沾襟雪絲紫指
喜嘶蟬樹遠盟鷗鄉近鏡奩光裏簾戶悄竹色侵棋
槐陰移漏晝永簾花鋪水清眠乍足晚浴初慵瘦約楚
裙尺二曲砌虛庭夜深月透龜紗涼生蟬翅看銀潢瀉
露金井鴉啼漸起

祝英臺近

攬秀
園

倚玲瓏尋窈窕瑶草四時碧小小蓬萊花氣透簾隙幾
回翠水荷初蒼崖梅小綺寮掩玉壺春色柳屏窄芳
檻日日東風幾陣吹吟筆曲折花房鶯燕似曾識最憐
燈影纔收歌塵初靜畫樓外一聲秋笛

又

后溪次韻日
熙堂主人

殢餘醒尋舊雨愁與病相半綠意陰陰絲竹靜深院絕
憐事逐春移淚隨花落似剪斷蛟房珠串喜重見為
誰倦酒慵詩貧屏掩雙扇白髮潘郎羞見看花伴可堪

好夢殘時新愁生處烟月冷子規聲斷

徵招

九日有懷
楊守齋

江籬搖落江楓冷霜空鴈程初到萬景正悲秋奈曲終
人杳登臨嗟老矣問古今清愁多少一夢東園十年心
事恍然驚覺腸斷紫霞深知音遠寂寂怨琴淒調短
髮已無多怕西風吹帽黃花空自好問誰識對花懷抱
楚山遠九辨難招更晚烟殘照

聲聲慢

柳花

燕泥沾粉魚浪吹香芳堤十里新晴靜惹遊絲花邊裊
裊扶春多憐漂泊記章臺曾挽青青堪愛處是撲簾嬌
嫩隨馬輕盈長是河橋三月做一番晴雪惱亂詩魂
帶雨沾衣羅襟點點離痕休綴潘郎鬢影怕綠窓年少
人驚卷春去剪東風千縷碎雲

又
送王聖
與次韻

瓊壺敲月白髮簪花十年一夢揚州恨入琵琶小憐重
見灣頭樽前漫題金縷奈芳情已逐東流還送遠甚長

安亂葉都是閒愁 次第重陽近也看黃花綠酒只合
遲留脆柳無情不堪重繫行舟百年正消幾別對西風
休賦登樓怎去得怕淒涼時節團扇悲秋

醉落魄

洪魯仲之江
西書以為別

寒侵徑葉鴈風擊碎珊瑚屑硯涼閒試霜晴帖頌菊騷
蘭秋事正奇絕 故人又作江西別書樓虛度中秋節
碧欄倚遍誰人說愁是新愁月是舊時月

水龍吟

燕翎誰寄愁箋天涯極望王孫草新烟換柳光風浮蕙
餘寒尚峭倚杖看雲剪燈聽雨幾番詩酒歎長安倦客
江南舊恨飛花亂清明後堤上斜陽風驟散香綿輕
沾吟袖麴塵兩岸紋波十里暖蒸香透海濶雲深水流
春遠夢魂難勾問鶯邊按譜花前覓句解相思否

又

舞紅輕帶愁飛寶韉暗憶章臺路吟香醉雨吹簫門巷
飄梭院宇立盡殘陽眼迷晴樹夢隨風絮歎江潭冷落

依依舊恨人空老柳如許
錦瑟年華暗度賦行雲空
題短句晴絲繫燕么絃彈鳳文君更苦烟水流紅暮雲
凝紫是春歸處悵江南望遠蘋花自採寄將愁與

又白蓮

素鸞飛下青冥舞衣半惹涼雲碎藍田種玉綠房迎曉
一奩秋意擎露盤深憶君涼夜暗傾鉛水想鴛鴦正結
梨雲好夢西風冷還驚起應是飛瓊仙會倚涼颺碧
簪斜墜輕妝鬪白明璫照影紅衣羞避霽月三更粉香

千點靜聞十里聽湘絃奏徹冰綃偷剪聚相思淚

天香

龍涎香

碧腦浮冰紅薇染露驪宮玉唾誰搗麝月雙心鳳雲百
和寶釧珮環爭巧濃熏殘炷疑醉度千花春曉金餅著
衣餘潤銀葉透簾微裊素被瓊篝夜悄酒初醒翠屏
深窅一縷舊情空趁斷烟飛繞羅袖餘馨漸少悵東閣
淒涼夢難到誰念韓郎清愁漸老

珍珠簾

琉璃簾

寶堦斜轉春宵翳雲屏敞霞卷東風新霽光照萬星寒
曳冷雲垂地暗憶連昌遊冶事照炫轉熒煌珠翠難比
是鮫人織就冰綃清淚猶記夢入瑤臺正玲瓏透月
瓊扉十二細縷逗濃香接翠蓬雲氣縞夜梨花生煖白
浸瀲灩一池春水乘醉恍歸時人在明河影裏

疎影

梅影

冰條凍葉又橫斜照水一花初發素壁秋屏招得芳魂
彷彿玉容明滅疎疎滿地珊瑚冷全誤却撲花幽蝶甚

美人忽到窓前鏡裏好春難折
閒想孤山舊事浸清漪
倒映千樹殘雪暗裏東風可慣
無情攪碎一簾香月
輕妝誰寫崔徽面
認隱約烟綃重疊
記夢回紙帳殘燈
瘦倚數枝清絕

玉漏遲

題吳夢窓霜
花腴詞集

老來歡意少
錦鯨去紫簫聲杳
怕展金奩依舊故人懷
抱
猶想烏絲醉墨驚醉語香紅
圍繞
閒自笑與君共是
承平年少
雨窓短夢難憑
是幾調宮商幾番吟嘯淚

眼東風回首四橋烟草載酒倦遊處已換却花間啼鳥
春恨悄天涯暮雲殘照

南樓令

開了木芙蓉一年秋已空送新愁千里孤鴻搖落江蘼
多少恨吟不盡楚雲峯往事夕陽紅故人江水東翠
衾寒幾夜霜濃夢隔屏山飛不去隨夜鵲繞疎桐

西江月

波影暖浮玉斚柳陰深鎖金鋪湘桃花褪燕調雛又是

一番春暮 碧柱情深鳳怨雲屏夢淺鶯呼繡窓人倦
冷熏爐簾影搖搖亭午

又茶蘼

閣

花氣半侵雲閣柳陰近隔春城畫欄明月暗瑤箏醉倚
滿身花影 翠格素虬晴雪錦籠紫鳳香雲東風吹玉
滿閒亭二十四簾春靜

鷓鴣天

清明

燕子時時度翠簾柳寒猶未透香綿落花門巷家家雨

新火樓臺處處烟
情默默恨懨懨
東風吹動畫秋千
刺桐開盡聲聲鳥
無奈春風祇醉眠

又

相傍清明晴更慳
閉門空自惜花殘
海棠半坼難禁雨
燕子初歸不奈寒
金鴨冷錦鴛閒
銀缸空照小屏山
翠羅袖薄東風悄
獨倚西樓第幾欄

夜行船

寒菊淒風樓小
蜨簾櫳靜半規涼
月夢不分明
恨無憑

據腸斷錦箋盈篋 哀角吹霜寒正怯 倚瑤箏暗愁難
說寶獸頻添玉蟲暗剪長記舊家時節

杏花天

瑞雲盤翠侵宮額 眉柳嫩不禁愁積 返魂誰染東風筆
寫出郢中春色 人去後垂楊自碧 歌舞夢欲尋無迹
愁隨兩槩江南北 日暮石城風急

又 昭君

漢宮乍出慵梳掠 關月冷玉沙飛幕 龍香撥指春風弱

一曲哀絃謾托 君恩薄空憐命薄青塚遠幾番花落
丹青自是難描摸不是當時畫錯

又

金池瓊苑曾經醉是多少紅情綠意東風一枕遊仙睡
換却鶯花人世 漸暮色鶉聲四起正愁滿香溝御水
一色柳烟三十里為問春歸那裏

浪淘沙

芳草碧茸茸染恨無窮一春心事雨聲中窄素宮羅寒

尚峭閒倚熏籠 猶記粉牆東同醉香叢金鞍何處驟
花驄裊裊綠窓殘夢斷紅杏東風

點絳脣

南漪釣隱
年存叟

午夢初回卷簾盡放春愁去晝長無語自對黃鸝語
絮影蘋香春在無人處移舟去未成新句一硯梨花雨

謁金門

花不定燕尾剪開紅影幾點落英蜂翅趁日遲簾幕靜
試把翠蛾輕暈愁薄寶臺鸞鏡屈指一春將次盡歸

期猶未穩

又

吳山
觀濤

天水碧染就一江秋色
鰲戴雪山龍起蟄
快風吹海立
數點烟鬟青滴
一杼霞綃紅濕
白鳥明邊帆影直
隔

江聞夜笛

又

芳事晚數點杏鈿香淺
惻惻輕寒風剪剪
錦屏春夢遠
穉柳拖烟嬌軟
花影暗藏深院
初試輕衫并畫扇
壯

丹紅未展

清平樂

曉鶯嬌咽庭戶溶溶月一樹湘桃飛茜雪紅豆相思漸
結 看看芳草平沙遊韉猶未歸家自是蕭郎漂泊錯
教人恨楊花

鳳棲梧

生香亭

竹香花深連別墅曲曲回廊小小閒庭宇忽地香來無
覓處杖藜閒趁遊蜂去 老桂凝秋森玉樹澗底孤芳

冉冉吹詩句一掬幽情知幾許鈎簾半畝藤花雨

少年遊

宮詞擬
小山

簾銷寶篆捲宮羅蜂蝶撲飛梭一樣春風燕梁鶯戶那
處得春多 曉妝日日隨春輦多在牡丹坡花深深處
柳陰陰處一片笙歌

甘州

燈夕寄
二隱

漸淒淒芳草綠江南輕暉弄春容記少年遊處簫聲巷
陌燈影簾櫳月暖烘鑪戲鼓十里步春紅敲枕聽新雨

往事朦朧 還是春江夢曉怕等閒愁見鴈影西東喜
故人好在水驛寄詩筒數芳程漸催花信送歸帆知第
幾番風空吟想梅花千樹人在其中


一萼紅

登蓬萊閣有感

步深幽正雲黃天淡雪意未全休鑑曲寒沙茂林烟草
俛仰今古悠悠歲華晚飄零漸遠誰念我同載五湖舟
磴古松斜厓陰苔老一片清愁 回首天涯歸夢幾魂
飛西浦淚灑東州故國山川故園心眼還似王粲登樓

最負他秦鬟妝鏡好江山何事此時遊為喚狂吟老監
共賦銷憂

詞綜卷二十



總校官庶吉士臣張能照
校對官中書臣潘庭筠
謄錄監生臣張德燾